

**Cate' gosenabia' rey Saúl na' rey
David bene' Israel ca'**



Los reinados de Saúl y David en Israel

Cate' gosenabia' rey Saúl na' rey David bene' Israel ca'

Los reinados de Saúl y David en Israel

Resumen del Antiguo Testamento

en el zapoteco de Zoogocho

Volumen V

LA LIGA BÍBLICA



LAS SAGRADAS ESCRITURAS PARA TODOS

LIGA DEL SEMBRADOR, A.C.

“Las Sagradas Escrituras para todos”

Publicado por

LA LIGA DEL SEMBRADOR, A.C.

Apartado 14-351

07810 México, D.F.

La ilustración en blanco y negro opuesta a la página 1 así como las ilustraciones en las páginas 8, 14, 20, 29, 32, 54 y 70 son propiedad de la Fundación David C. Cook, usadas con permiso.

Primera edición

Los reinados de Saúl y David en Israel

en el zapoteco de Zoogocho

94-080 México, D.F. .SC

1994

Da' gole da' bžia Diosen' bia' gone'

Resumen del Antiguo Testamento

Este libro es el quinto volumen del Resumen del Antiguo Testamento que presentamos en una serie de siete.

- Volumen I:** Can' goc cate' gwxe yežlion'
Cómo comenzó el mundo
- Volumen II:** Diosen' chebeje' bene' Israel ca' Egipto
Dios saca a los israelitas de Egipto
- Volumen III:** Bene' Israel ca' gosone' güedenag len
Diosen'
Los israelitas desobedecieron a Dios
- Volumen IV:** Bene' gosaclene' nación Israel gwde
got da' Moisésen'
Los líderes de Israel después de la muerte
de Moisés
- Volumen V:** Cate' gosenabia' rey Saúl na' rey
David bene' Israel ca'
Los reinados de Saúl y David en Israel
- Volumen VI:** Diosen' bonite' nación Efraín da'
gosejnlaže' lgu'a lsaca'
Dios destruyó la nación de Efraín por su
idolatría
- Volumen VII:** Bene' Israel ca' besyega'ane' pres
Babilonia gayonši iz
Los israelitas fueron desterrados a
Babilonia por setenta años

Introducción

Xtiža' Dios nyojen diža'xtil le'e libr da' nzi' LA BIBLIA. Part nechw nzi' EL ANTIGUO TESTAMENTO, na' zejen Da' Gole Da' Bžia Diosen' Bia' Gone'. Part gwchope nzi' EL NUEVO TESTAMENTO, na' nyojen diža'xon le'e libr da' nzi' Diža' Güen Che Xancho Jesucristo.

Libr da' noxo' nga nzi' Can' Goc Cate' Gwxe Yežlion'. Naquen libr nechw lao gaže cuen libr da' chesoen' diža' ċhe da' ca' zjanyoj le'e da' nzi' El Antiguo Testamento. Libr nechw nga nsan' da' zan da' žialao da' zjanyoj le'e part nechw ċhe El Antiguo Testamento, part da' nzi' Génesis. Gague nyoj doxen Génesis de diža'xon cont beyaše'ch libr nga. Še chaclažo' gwlabo' doxen Génesis, cheyaļa' yeyiljon le'e Biblia de diža'xtil.

Índice

sección

página

79. Samuel goque' to bene' be' xtiža' Dios.....	1
80. Bene' filisteos ca' gosone' gan bene' Israelen'.....	3
81. Diosen' bzoe' Saúl goque' rey che Israel.....	7
82. Rey Saúl bi bzenague' che Dios, na' Diosen' gože'ne' bich gague' rey yesša.....	12
83. Diozen' gwleje' David gague' rey cobe bene' nabia' Israel	15
84. David gwđin arpa cheben' cont bzenag rey Saúl	18
85. David betwbe' to soldadw ton gual che bene' filisteos ca'	18
86. Rey Saúlen' bich ble'ede' Daviden' güen san goclaže' gote'ne'.....	22
87. Daviden' bxonjde' rey Saúlen', na' bene' zan gwzolao gosede'e le'	25
88. David chop ni'a bosle' rey Saúlen' cate' gota' latje gote'ne'	28
89. Rey Saúlen' len bi' che' ca' gosate' to lao yela' gwdiłe.....	35
90. Gosone' Daviden' rey gwchop che bene' Israel....	37
91. Diosen' gwne' gone' güen len Daviden'.....	42
92. Rey Daviden' bene' to da' xinj, perw Diosen' bezi'xene' che'.....	44
93. Absalón bedabaga' xabe' rey David	48
94. Diosen' bene' cont bi ben Absalónna' gan.....	51

95. Rey Daviden' bsiṇi'a ɕhe' cont gone' to yodao' ɕhe Dios	56
96. Rey Daviden' bzoje' zan da' gosole' gosonxene' Dios	60
97. Salomón xi'in Daviden' goque' rey gwyon ɕhe Israelen'	63
98. Salomón gwnabi'e lao nación Israel.....	65
99. Rey Salomón bene' to yodao' blao ɕhe Dios	69



Anan' gweje' jačeže' cho'a puert ɕhe yodaon', na'
gota'yoede' Diosen' gone' soa to bi' ɕhe'.

79. Samuel goque' to bene' be' xtiža' Dios

(1 Samuel 1 — 3)

Gwzoa to bene' byo gože' Elcana, ben' golje' lo diaža che da' Efraín, na' gwzoalene' chop no'ol. Toe gože'ne' Ana na' goque' bene' güiž, na' leca gocyashe'laže', le no'olen' yeto benle' che'. Yogüiz Elcanan' gwche' yogo' bene' lo' yo'o che' ca' yež ga nzi' Silo, le nga gwzoa yodao' dan' chacte chedobe. Na' yogüiz cate' gweyeje', jetue' to chop beyixe' benxene' Dios. Nach tñi'a šlac zjanite' yež da' nzi' Silo, Anan' gweyeje' jacheže' cho'a puert che yodaon', na' gota'yoede' Diosen' gone' soa to bi' che'. Gwlo'o cho'e gone'be' lo na' Dios gacbe' nazareo šlac mbambe' še Diosen' gwzenague' gwnežjue' to bi' che'. Beyechj ža, beza' Elcana len bene' lo' yo'o chen' jaya'ac liže'. Na' gague goc sša, bia' Anan' bdao'. Na' cate' gwzane' to bi' byo, na' gože'be' Samuel.

Cate' bsan xiže' Samuelen', xña'ben' gwche'ebe' gan' zoa yodao' dan' chacte chedobe, na' bene'be' lo na' Elí ben' goc bχoz blaon', na' gože'ne':

—Bidado' nga gwnaba' lao Dios, na' cana'ate bena'be' lo ne'e.

Ana bolgüiže' Dios be'ene' yela' choχclen dan' bzenague' chen'. Nach bocua'ane' Samuelen' lo na' Elí ben' goc bχoz blaon', nach yogo' bene' lo' yo'o che Elcana jaya'ac liže', na' Samuelen' bega'anbe' bosgol

Elín' lebe'. Yogüiz cate' chej xña'ben' len Elcana gan' zoa yodao' dan' chacte chedobe, cho'e xabe' da' cobe.

Gwnita' çhop xi'in Elí, toe' gože' Ofni na' yetoe' gože' Finees. Chope' bi bosozenague' che Dios. Cate' bene' Israel ca' zjanche'e beyixe' chesote'ba' chesonxene' Dios, Ofnin' na' Fineesen' bi gosebeze' yeyož šey seb cheban' nach yesenabe' late' xpela'ban', san gosone' byen gosenabe' xpela'ban' cate' za' cheyožte chesote'ba'. Lecze gosone' yeto da' mal, gosata'lene' no'ol ca' chesap yodaon'. Gwdil Elín' legaue' dan' gosone' da' ca', perw bi bosozenague' che'. Ne late'ze ca' goc Samuelen' ca' legaue', le bi nga bembe' doxen da' gwna Dios.

Goc to ža, to bene' choe' xtiža' Dios jane'e Elín' na' gože'ne':

—Diosen' gwsele' neda' cont yosnisda' le' yenit bene' lo' yo'o çhio' ca' dan' bi'o latje gosebejyichj xi'ino' ca' Dios. Na' cont nachbia' xtiža' nga naquen che Dios, chopte xi'ino' ca' yesate' toz ža.

Elín' ba nacchgüe' bene' gole, na' to že' šlac zjadie' lo' yodao' chesetase' Samuelen' bebambe', le benebe' cholgüiž to bene' lebe' cho'e labe'. Goquebe' še Elí nan' cholgüiž lebe', nach gwyassesbe' jana'be'ne', na' gožbe'ne':

—Nga zia'.

Na' Elín' gože'be':

—Bitwna' yolgüiža' le'.

Na' lecze ca' goc yechop ni'a. Da' gwyon ni'a Elín' gocbe'ede' Diosen' cholgüiže'be'. Nach gože'be':

—Beyata' na' bzenag, na' še Diosen' yolgüiže' le' da' yoble, boži'i xtižen', gože': "Xana', gwñeteze le chzenaga' ghio".

Samuelen' beyata'be' na' da' yoble bolgüiž Diosen' lebe' bi'e labe'. Cani'ch boži'ibe' xtižen' gožbe'ne' can' gož Elín' lebe', na' Diosen' gože'be':

—Yogo' da' mal ca' ba goša' Elín' yesac che bene' lo' yo'o che' ca', da' li yesaquen. Na' gož Elín', naquen to da' saca'zi'e neche yogo' da' mal zjanon xi'ine' ca', le nezeteczeden', bi bžone' yesonen'.

Beyečhj ža šezille, Samuelen' bi cheyaxjebe' ye'be' Elín' dan' gož Diosen' lebe', perw Elín' bene' byen, nach žan ca žan gožbe'ne'. Na' Elín' gwne':

—Diosen' naque' la'zelao bene' zaca' cont ne' bin' cheyała' gac.

Samuelen' gwcha'ogüe', na' Diosen' bzejni'ide' le' che da' ca' za' gac na' gwdixjue'ede' bene' Israel ca' che da' ca' na' gosaquen con can' bšalj Samuelen'. Nach yogo' bene' gosacbe'ede' le naque' to bene' choe' xtiža' Dios.

80. Bene' filisteos ca' gosone' gan bene' Israelen'

(1 Samuel 4 — 7)

Lecze do ca tiempa' bene' zan bene' filisteos ca' ja'aque' gosedillene' bene' Israel ca'. Lecze ca' goson

bene' Israelen' bosotob bene' byo ca' cont gosedile'.
 Lo ža nechw gosedile', bene' filisteos goson gan
 gwdila'. Nach ca nac cajan' gan' yo'ošagüe' yej ta'a
 ca' gan' zjanyoj ley che Dios, bene' Israel ca'
 besyechoglaže' gosebejen' gan' x oan lo' yodao' dan'
 chacte chedobe na' goso'en lao yela' gwdila'. Gosone'
 xbab še da' yesone' ca' Diosen' gaclene' legaque'
 yesone' gan bene' filisteos ca'. Nach gosesele' chop
 bene' ja'aque' Silo jasexi'e caja' jasesanen' latj gan'
 zjanon xišna' soldadw che bene' Israelen'. Bene' ca'
 gosac xi'in Elí bačh zjanaque' bxoz, na' legaque'
 ja'aclene' caj dan' chnabia' zacan'. Nach da' yoble
 gosedil bene' Israelen' len bene' filisteos ca', na' cani'
 bene' filisteos ca' gosonchgüe' legaque' gan. Gosat
 šichoa mil soldadw Israelen', gosat chopte bi' che Elí,
 na' bene' filisteos ca' lecze goseque'e caj gan'
 yo'ošagüe' yej ta'a gan' zjanyoj ley che Dios. Cate'
 gwneze Elín' can' goca', gwbiže' coscože'le lo siy gan'
 chi'en', gwdin xcogue' na' gote'. Na' ca nac Elín',
 gwnabi'e Israelen' ca' juez lao čhoa iz.

Na' caj gan' yo'ošagüe' yej ta'a ca' gan' zjanyoj ley
 che Diosen', bene' filisteos ca' besyeyo'en laže' na'
 gosexoen' lo' yodao' gan' chesonxene' lgua'a lsaca'
 čhegaquen' dan' chesejnilaže'. Beyečhj ža šezille
 besyeželde' lgua'a lsacan' chnabia'ch chesejnilaže'
 chtoľe' lo yole. Na' bosyozoe'ne' xlatje', perw beyečhj
 ža yoble, besyeželde' le' gague gwbižze' san gwchog
 yičhje' len ne'e. Na' Diosen' bene' cont bene' filisteos
 leca gosale'de', leca gwyaščgua bzina', lecze yogo'ze
 bene' besežaglagüe' len to da' gose'ede', gosebia ca no

błol cuerp chegaque'. Gosac chegaque' yogo' da' qui, le Diosen' goclaze' gwzejni'ide' legaue' bi zjazaque' yesoxe' caj chen'. Nach bene' filisteos ca' goso'en to to ciuda chegaquen', perw gate'ze ja'aclenen', bene' lo yeža' gose'ede' gosebia błol chegaquen'. Nach ja'aque' jaseṇabde' bṡoz che' ca' len bene' güeneya'a ca' bi cheyał'a yesone'. Nach bṡozen' len bene' güeneya'a ca' gose'ene':

—Le cuej chop vaca' be gwṡob to carret, na' lo' carreten' le co'o cajan' na' le co'o yeto chope da' zaca'chgua lo'enna' da' šjaya'ac len cajan' cont Dios ben' chesejnilaže' bene' Israel ca' bich že'e chio'.

Ca' gosone', na' bososane' carreten' gosexob vaca' ca' len con ga chesenan chegacba'. Nach vacan' to licha jaya'acba' to yež ga zjambane bene' Israel da' chi' gał'a'ze. Na' bene' filisteos ca' cate' besele'ede' licha na' jaysan be ca' cajan', gosacbe'ede' neche caj dan' chnabia' zaca', gosał'e'de', gague con gosac chegaque' can'.

Ciuda gan' ja'ac vacan' goquen to ciuda gan' goseže'e bṡoz che bene' Israel ca'. Na' cate' bene' ca' zjaže' na' besele'ede' bžin carreta zenoan' caj gan' yo'ošagüe' yej ta'a ca' gan' zjanyoj ley che Dios, leca besyebede'. Nach gosote' vaca' ca' na' gosone'ba' lo na' Dios, bosyo $\dot{c}$ hinje' carreten' besyeyonen' guague, na' da' ca' dan' zjanac da' zaca' dan' goseseł'a' bene' filisteos ca', bosocue'en to lo yej da' chi' gał'a'ze. Perw bał bene' ca' zjaže' lo ciudan' gosene'e lo' caj gan' yo'ošagüe' yej ta'a ca' gan' zjanyoj ley che Dios,

na' bža'a Diosen' legaue' dan' gosone' ca' na' bene'
cont bene' zan gosat. Cate' besele'e bene' ca' yezica'
can' goca', leca besyegüine'de' na' gosone' xbab še
güench yesesele' cajan' yeto yež yoble. Nach
gosenabde' bene' ca' zjaže' lo' ciuda da' nzi' Quiriat-
jearim yesyeyo'en, na' bene' qui besyeyo'en laže', na'
nga gwxoan lao galj iz.

Cate' got Elí nach Samuel na' goque' juez che
Israel. Gwzoę' lo yež da' nzi' Ramá, la'czla' yogüiz
gwyeye' yešone yež jane'e bi chesac che bene' zjaže'
na', na' goclene' legaue' len bi da' gosac chegaue'.
Ba goc ca do galj iz bežin Israel caj gan' yo'ošagüe'
yej ta'a ca' gan' zjanyoj ley che Dios, cana' bene'
Israel ca' gosebejyichje' da' ca' gosejnilaže' da' bi
zjanac dogualje Dios, na' besezolağüe' gosonxene' toz
Dios ben' nac dogualje. Nach Samuelen' gože' bene'
Israel ca' yesyežaglone' le' ciuda da' nzi' Mizpa
šjaselgüiže' Diosen'. Na' cate' besežine' na', bosolgüiže'
Diosen', gosene':

—Chacbe'eto' da' zan da' xinj da' nonto'.

Šlac zjanite' na', bene' filisteos ca' gosaclaže'
yesote'ne'. Cate' gosacbe'e bene' Israelen' ba zja'ac
bene' filisteon', besežebe' na' gose'e Samuelen'
yolgüiže' Diosen' cont gaclene' legaue'. Nach
bolgüiže' Diosen', na' lecze betue' to xila' dao' bzeye'
doxemba' lao Dios. Diosen' bzenague' che' na' bene'
gošj gwtinchgua cont besežeb soldadw che bene'
filisteos ca'. Nach ja'ac soldadw che bene' Israelen'
jasa'ogüe' legaue' na' bene' zan gosote'. Beyož goc

ca', bene' filisteon' besyega'an lažgaque', na' zan iz
bich gosediłlene' bene' Israel ca'.

81. Diosen' bzoe' Saúl goque' rey che Israel

(1 Samuel 8:1 — 13:2)

Cate' goc Samuelen' bene' gole, bzoe' xi'ine' ca'
gosaque' juez che Israel, perw bi gosone' güen can'
ben xagaquen'. Legaque' gosezi'e no mechw na' bi
gosone' yela' justis ca cheyała'. Nach bene' gole blao
che Israelen' jasa'aque' jasene'e Samuelen' na'
gosenabde'ne' gwzoe' to bene' gaque' rey bene' nabia'
legaque'. Samuelen' ne late'ze bi beque'e can'
gose'enen'. Perw cate' gwnabde' Diosen' gwzejni'ide' le'
bi cheyała' gone', Diosen' gože'ne' guac gone' dan'
chesenabde'ne'. Diosen' lecze gože'ne':

—Dan' chesenabe' soa rey bene' nabi'e legaque', bi
nacho chosozoe' le' to šla'ale, san nedan' chosozoe' to
šla'ale, bich chesaclaže' nabi'a legaque' ca rey
chegaque'. Guac soa ben' gac rey chegaquen', perw
techle yesale'de', le rey ben' chesenaben' solagüe'
gwchixjue' legaque' na' gone' ga yesonche'e xšine'.
Cana'ch yesyetinjde' dan' gosenabe' soa to rey nabia'
legaque', perw bich bi gac yesone'.

Nach beyej Samuelen' jayeže' bene' ca' can' gwna
Diosen'. Bia'cze bi bosozenague', san gosone' byen soa
to rey nabia' legaque', can' nita' yež ca' yezica'.



Saúlen' bzoa xibe' lao Samuelen'.

Nach Diosen' gože' Samuelen' gone' dan'
chesenabde'nen' lecze blo'ede'ne' nac gone' cueje' rey
čhegaquen', gože'ne':

—Gwɣe ca na'a sela' to bene' byo ben' golje' lo
diaža che da' Benjamín. Bzoa set zix yichjen' cont
nacbia' len' gac rey che Israel. Le' yosle' bene' Israel
ca' lao bene' filisteon'.

Ca' goc beyečhj ža, to bene' le Saúl gwyje'
janabde' Samuelen' ga yeželde' xpurr xen' be gosenit.
Diosen' blo'ede' Samuelen' benan' gac rey nechw che
Israelen'. Nach Samuelen' gože' Saúlen' ba besyežel
burr ca' na' gože'ne' gosagüe' txen lo ža'na' cate'
chesone' lni chesonxene' Dios.

Nach chope' ja'aque' ga ze to mes de yej ga
chesonxene' Dios. Nga Samuelen' bnežjue' Saúlen'
late' bela' be chnabia' nacche güen cont gwdagüe'. Lo
že'na' Samuelen' gože' Saúlen' yega'ane' tase' liže'
na'ze. Beyečhj ža, chope' ja'aque' cho'a ciudan'. Nga
Samuelen' bzoe' late' set yichj Saúlen', na' gože'ne':

—Le' gaco' rey che Israel.

Lecze gože'ne' da' gac che' lo žana', na' yogon'
goquen' can' gož Samuelen' le'. Lo žana' Diosen'
bzejni'ide' Saúlen' cont be'e xtižen' len yela' sina' na'
bše'e xbab čhen' cont bi bene' ca chon note'ze bene'.
Cate' bežin liže', bitw gože' bene' lo' yo'o che' ca'
dan' gož Samuelen' le' gaque' rey. Toz da' gože'ne'
can' gwne' che burr ca'.

Nach Samuelen' gože' bene' Israel ca' yesyedobe' lo ciuda da' nzi' Mizpa. Lo ciuda nga gosone' ca to rifa cont gosebeje' ben' gac rey. Da' nechw gosebeje' diaža che da' Benjamín, da' gwchope na' gosebeje' bene' lo' yo'o che Saúl, na' bzebte gosebeje' Saúl. Cate' besyeyiljue'ne' besyeželde'ne' yo'e chcuasē' ladjo yoa', nach ja'aque' jasyeleje'ne'. Beyoža' Samuelen' gože' bene' yež nac cheyaļa' gon to rey, na' bzojen' to le'e yiš. Nach botoben' bcua'anen' lo' yodao' dan' chacte chedobe. Beyoža'ch gože' bene' Israel ca' guac šjaya'ac ližgaque'. Lecze len Saúlen' beyej liže', perw beče'e to chop soldadw ca' len le'.

Gwde ca do tbio' cate' soldadw che bene' ca' zjanzi' amonitas jasene' gwdiļe len bene' ca' zjaže' to ciuda ga mbane Israel. Cate' gwneze Saúlen', btobe' bene' zan na' cani' goclen Diosen' le' cont bosle' ciudan' lo na' bene' amonitas ca'. Lo žana' bene' Israel ca' gosaclaže' yesote' bene' gualaž chegaque' ca' bi gosaclaže' gac Saúlen' rey, perw Saúlen' bi goclaže', le gwneзде' gosone' gan lao yela' gwdiļen' da' ba goclen Diosen' legaque'. Nga besyeya'ac yogo' bene' Israel ca' na' jaya'aque' to ciuda da' nzi' Gilgal na' gosote' to chop beyiže' gosonxene' Diosen', be gosagüe' txen len bχoz ca'. Lecze gosebeje' žana' cont bosozoe' Saúlen' corona, zeje' diža' gwzolaogüe' gwnabi'e ca rey. To lni xen gosone' do ža.

Šlac ne' zjanita' bene' ca' lo ciuda da' nzi' Gilgal, Samuelen' zelao bzoe' consejw chegaque'. Zgua'tec gože' legaque':

—Le na yogo' da' mal da' nona'.

Perw yogüe' gose'ene':

—Bitwbi da' mal nono'.

Nach jayse'ede' laže' yogo' da' güen da' non Diosen' len da' xoxta'ogaque'. Jayse'ede' laže' can' ben Diosen' bebeje' legaque' Egipto na' bene' lo na'gaque' Canaán. Lecze jayse'ede'ne' can' gosone' da' zan nī'a, gosonxene' lgua'a lsaca' gualaz da' yesonxene' ben' nac dogualje Dios, na' da' gosone' ca', zan nī'a be' Diosen' latje bosonite' lao yela' gwdil ca'. Lecze jayse'ede' laže' yogo' nī'ateze cate' gosebejyichje' bich gosonxene' lgua'a lsaca' ca' na' gosenabe' lao Diosen' yosle' legaque', Diosen' bzenague' chegaque'. Da' yoble gože'ne':

—Bi benle güen gwnable soa to rey chele, perw na'a, yogo'le lente reyna', gwsaca'le gonle can' zjanyoj yogo' ley che Diosen'.

Bzebte, Samuelen' gwzi' lo ne'e yolgüize' Diosen' ne chegaque'.

Nach rey Saúlen' gwchie' šon mil soldadw yesenita' len le' na' len bi' che' Jonatán, na' yogo' bene' ca' yezica' jaya'ac liže'.

82. Rey Saúl bi bzenague' che Dios, na' Diosen' gože'ne' bich gague' rey yesša

(1 Samuel 13:3 — 15:35)

Gwdena' bene' filisteos ca' bosocode' lježe' gosaque' bene' zan na' bososini'a chegaque' cont yesediłlene' bene' Israel ca'. Rey Saúlen' len soldadw che' ca' zjanite' lo ciuda da' nzi' Gilgal chesebeze' yežin Samuelen' cont gote' to chop beyixe' gonxene' Dios. Samuelen' gože' Saúlen':

—Cuezo' neda' gaž ža.

Perw lo ža gaža' bina' yežine', na' to xonj bene' ca' gwzolao besyeya'aque'. Da'nan' cuin rey betue' beyixe' ca' lao Dios, la'czla' gwneзде' bi cheyała' gone' dan' nac ca'. Bi gwleze' yežin Samuelen' gonen'. Gague goc sša bežin Samuelen', na' cate' gwneзде' can' goca', leca bloque', na' gože' Saúlen':

—Neche dan' beno' da' bi cheyała' gono', Diosen' chiljue' yeto bene' yoble gague' rey che Israel.

Beyoža', Samuelen' beyej liže'.

Saúlen' goque' to bene' gual. Btobchgüe' bene' zan cont bene' gwdiłe len bene' ca' besegue'e bene' Israelen' na' yogo' ni'a gosone' gan lao gwdiłen'. Bia'cze gota'ch da' zed che' len bene' filisteos ca'.

Gwdechle Samuelen' gože' Saúlen':

—Diosen' che'nde' gono' gwdiłe len bene' ca' zjanzi' amalecitas na' goto' yogo' bene' ca' na' yogo' beyixe' chegaque'. Ba gwne' cheyała' yesat yogo'lole'.

Diosen' bene' ca' len bene' amalecitas ca' neche
dan' gosone' gwdil len bene' Israelen' caten' zjangüe'e
nez besyeya'aque' Egipton' cont besyežine' Canaán.
Nach Saúlen' btobe' bene' zan soldadw na' bene' gwdil
len bene' amalecitas ca'. Bene' legaque' gan na' betue'
yogüe', toz ben' nac rey bi betue'. Benga gwzene'ne'
gwchi'ene' pres. Lecze bene' Israel ca' gosezi'xene' bi
gosote' beyixe' ca' zjanac be güen, lete be ca' bi
zjanactec güen gosote'. Beyoža' Diosen' bolgüize'
Samuelen', gože'ne':

—Bi ben Saúlen' can' gwnian', na' chetinja' dan'
bia' latje naque' rey.

Nach gwyej Samuelen' jaydiljue'ne'. Cate'
beželde'ne' zoe' Gilgal, zgua'tec Saúl'na' gwne':

—Bena' dan' gwna Diosen' gona'.

Perw Samuelen' boži'e xtižen':

—¿Nacxchen' šeca' chenda' chososya'a beyixe'?

Na' Saúlen' gwne':

—Le gwche'to' yogo' beyixe' be chnabia' zjanac be
güen cont gotto'ba' gonxento' Dios, perw yogo' be ca'
yezica' betto'ba'.

Nach Samuelen' gozne':

—Nže'e Diosen' gože' neda' le' bich gac gaco' rey,
le bi beno' can' gwnen'. Diosen' gože' le' goto' yogo'
bene' na' yogo' beyixe', na' bi beno' ca', san
bega'anleno' balba'.

Na' Saúlen' gwne':



Samuelen' gože' rey Saúlen': —Diosen' gože' le' goto' yogo'
beņe' na' yogo' beyixe', na' bi beno' ca', san bega'anleno'
baľba'.

—Perw neda' bena' can' gwna Diosen'. Gwya'a jatiłlena' bene' amalecitas ca', betua' yogüe', na' gwzena' rey čhegaque'. Bene' soldadw čhia' ca', legaque' gosone' byen to čhopze beyixen' besyeče'e cont gotto'ba' gonxento' Dios.

Samuelen' gože'ne':

—Da' naquen da' žialao xen, Diosen' che'nde' gwzenago' čhe', nacchen da' žialao clél ca' goto' beyixe' gonxeno'ne'. Dan' ža Diosen' goncho, lenna' nac da' žialao. Toz ca' nonczen' goncho no yela' guaža' o gonxencho lgua'a lsaca' še bi choncho da' ža Diosen' goncho. Diosen' bich chaclaže' gaco' rey, le bi beno' da' gwne' gono'.

Nach bžeb rey Saúlen' na' goclaže' co'oyele' Samuelen' yezi'xene' čhe', perw Samuelen' gože'ne' Diosen' bi chša' xbab čhen' ca' chon benač, na' bitw zoan xožecho, le Diosen' gwzoe' yeto bene' yoble gaque' rey. Beyoža' Samuelen' betue' rey čhe bene' amalecitas ca' na' beze'e beyej liže'. Lecze ca' Saúlen' beze'e beyej liže', na' gwzolaon lo žana' bich besele'ecze lježe'. Decze de, Samuelen' leca gocyasē'de' dan' bich gac Saúlen' rey.

83. Diozen' gwleje' David gaque' rey cobe bene' nabia' Israel

(1 Samuel 16:1-13)

Gwde yeto ža yoble goc da' ca', Diosen' gože' Samuelen' bich yegüine'de' dan' goc čhe rey Saúlen',

Esta ilustración
no está
disponible.

Daviden' gwdiṇ arpa ɕheben' šlac zejbe' yix̣e' güeye' xila'.

san šeje' šjazoe' set yichj yeto bene' byo yoble cont
nacbja' bena' gac rey cobe. Gwsele'ne' šeje' Belén
cont šjazoe' set yichj to xi'in ben' le Isaí. Benga
goque' cuent lao diaža che da' Judá. Nach gwyej
Samuelen'. Cate' ble'ede' ca toŋ na' xdan nac bi' che
Isaí bin' chnabia' ngolech, bene' xbab šeca leben'
cheyiljue'. Perw Diosen' gože'ne':

—La'czla' ndonbe' na' nache' xdan, gague leben'.
Benachen' con do yichjlaoze bene' chesele'ede', perw
neda' nombi'a lo' yichjlažda'ogüe', nachen' chžia' bia'.

Nach Isaí gox bi' che' ca' yezica' tgüejje tgüejbe',
perw Diosen' gože' Samuelen' ne to bi' ca' ca nache'
bin' cheyiljuen'. Nach gwnabe Samuelen' Isaín' še
bich nita' xi'ine', na' Isaín' gwne' ne' zoa yetobe' lebe'
David, bi' nacch bi' xcuide', perw zejbe' yixe' güeye
xila'. Samuelen' gože'ne' yeyaxe'be'. Cate' bežin
Daviden', Diosen' gože' Samuelen':

—Bi' ngan' gac rey. Bzoa set yichjbe'.

Nach Samuelen' bzoe' set yichj David na' šlac
chone' da' nga yogo' bi' biše'be' ca' chesena'be'. David
gocbe' to bi' xdan na' bi' gual, na' gocbe' to bi' yichj
yaš. Na' gwzolaon ža na'te Spiritw che Diosen'
gwzoan len David. Na' Samuelen', beyož bzoe' set
yichj Daviden', nach beyej liže'.

84. David gwdin arpa cheben' cont bzenag rey Saúl

(1 Samuel 16:14-23)

Dan' bich goclen Diosen' Saúlen', tgüeję gwyo'o gwyaz to da' xigüe' yichjlažda'ogüen'. Nach bene' güen žin che' ca' gose'ene' caten' chac che' ca' cheyała' chiljue' to bene' chin arpa, cont len ši'i arpan' yezoa yichjlažda'ogüen' binjo. Toe' gože'ne' guac bin' le David, bi' che Isai, na' rey goxe'be'. Can' goc, bate'teze cho'o chaz da' xigüen' yichjlaždao' rey, Daviden' la' chyintebe' arpan'. Reyen' leca güen ble'ede' David, na' gague goc sša bzoe'be' chņa' chgüiabe' na' bgüe'ebe' xałane' de ya da' chaze' cate' cheje' lao gwdiłe.

85. David betwbe' to soldadw ton gual che bene' filisteos ca'

(1 Samuel 17:1 — 18:5)

Goc to šlas cate' soldadw che bene' Israelen' chesediłlene' bene' filisteos ca', na' bene' Israel ca' len bene' filisteos ca' zjanon xišne'e ya'a da' zjanita' šła'a güeję. Ca' chac cate' bchoj xišna' to soldadw filisteo ben' nyaz xałane' de ya. Naque' to bene' gual na' ndone' ca do šon metr. Benga gože'ne' Goliat. Chosye'e gože' bene' Israel ca' yesebeje' to bene' byo tiłlen le'. Lecze gwne' še cuine' na' gon gan, nach bene' filisteos ca' yesenabi'e bene' Israel ca', perw še gon gan soldadw che bene' Israelen', nach bene' Israel

ca' yesenabi'e bene' filisteos ca'. Yogo'ze bene'
Israelen' besežebchgüe' yesediłlene'ne'.

Len yon bene' biše' David ben' zjangolech zjanaque'
txen len soldadw che rey Saúlen', na' Daviden'
zjaydabe' güeye xila' che xabe'. Goc to ža, Isain'
gože' David:

—Šejo' šjana'o nac zjanita' bi' bišo' ca' na' gua'tio'
late' da' yesagwbe'.

Cate' bžin David gan' zjanon xišne'en, ba gwde
tbio' yogo' ža chchoj ben' gože' Goliat, cheje'
chjašebe' bene' Israel ca' len xtižen', chonle' chegaque'
da' chesežebe' yesediłlene' le'. Cate' gwneze Daviden'
can' chaca', na' gwnabe':

—Bi cheyała' güe'cho latje soach ben' chne' yela'
ya' che chio' bene' Israel, le naccho soldadw che
Diosen'. Neda' tiłlena' Goliaten'.

Cate' gwneze Saúlen', goxe' Daviden', na' gože'be':

—Le' bitw gac tiłleno'ne', le naque' to soldadw
bene' ba nezchgüede' nac tiłe', na' le' ne' naco' bi'
güego'ze.

Perw David boži'ibe' xtižen':

—Neda' chjayoa' xila' che xan' na' ba betua' no
león no oso be chesaclaže'ba' yesagwba' xila' ca'.
Cate' chona' ca', Diosen' chna' chgüe' neda', na' zoa'
lez lecze ca' na' güie' neda' šlac tiła' len bene'
filisteon' le Goliat.



To soldadw ton gual che bene' filisteos ca' gwle' Goliat
benle che bene' Israel ca' na' jašebe' legaque'.

Bich bi goc na rey, yetoze da' bene', bi'ene' xalane' dan' nac de ya da' chghin le' cate' cheje' lao gwdile, perw cate' gwyaz Daviden' len, naquen da' cha'o na' da' zi'i na' bi yolaoben', da'nan' belechjben'. Beyoza' gweybe' ga de to xitjw na' jatobbe' gayo' yej da' zjanac ba'a, gwlo'oben' lo' morral cheben' na' gwza'be' zjatillembe' Goliaten'. Bich bi bexo'be' da' yoble, toze yixjwdošon da' bexo'be'.

Cate' ble'e Goliaten' zej Daviden', leca bxiže' chebe', perw David gožbe'ne':

—Dios ben' nac dogualje, ben' chonxen neto' bene' Israel, gaclene' neda'. Na'aža yogo' bene' že' yežlio yesele'ede' Diosen' chaclene' neto'.

Goliaten' gwze'e zeje' gan' ze David, lecz ca' ben Daviden', gwzolao chbiga'be'. Nach Daviden' gwzi'be' to yej dan' yo'o lo' morral cheben', gwlo'oben' lo' yixjwdošona', beyoza' bzechjbe' yixjwdon' na' bzala'be' yaja'. Yejen' jatan' loxga Goliaten', na' gwbixe'. Daviden' chxite'be' gweybe' gan' de Goliaten' jačhogbe' yichjen' len spada checze'. Leca besežeb bene' filisteos ca' na' bosoxonje', perw bene' Israel ca' gosa'ogüe' legaque' besyežinte laže', na' bene' zan gosotchgüe'. Cate' rey Saúl ble'ede' can' goca', gwnabde' Abner, ben' goc xan soldadw che' ca', šjasane' Daviden' lagüen', na' Abneren' jasane'be'. Cate' bžimbe' lao rey, lo taca'be' nžiabe' yichj Goliaten'. Na' gwnab rey Saülen' yega'anlembe' le'. Beyoza' xi'in rey bin' gože' Jonatán leca šagüe' gosenita'be' len Daviden' na' bnežjwbe' che Daviden' to spada. Cana'

gwzolao chsela' reyen' lebe' ga de yela' gwdiŕe, na' leca güen bembe' gan' gwsele'ben'. Nach bzoe'be' gwlo'o lo na'be' to xonj soldadw che' ca'. Yogo'ze bene', lente yezica'chle soldadw ca' bene' zjanac bene' blaoch ca lebe', besyebechgüede' cate' gosende' can' chjen Daviden' gan lao yela' gwdiŕ ca'.

86. Rey Saúlen' bich ble'ede' Daviden' güen san goclaze' gote'ne'

(1 Samuel 18:6 — 20:42)

Goc to šlas cate' bežin Daviden' beyož betchgüe' zan bene' filisteos besežaš zan no'ol Israel, chesol chosoye'e jasešague' soldadw che' ca'. Gosole' bosoguale' rey Saúlen' lente David, gosene':

—Saúlen' zan mil soldadw ca' chesegue'e le' ba betue', perw Daviden' ba betue' yeši ca'ate'le.

Cate' bene Saúlen', leca bloque', le bene' xbab bene' ca' la' yosozoatie' Daviden' gague' rey. Cana' gwzolao bich ble'ede'ne' güen.

Beyečhj ža, da' xigüen' gwyo'o gwyazen yičhjlaždao' Saúlen' da' yoble, nach Daviden' gwdiŕ arpa čhen' cont bzenag reyen'. Šlac chyiŕ Daviden' arpan', Saúlen' noxe' to yag na' zoa to ya toše' lagüenna', na' bzalen' čhop ni'a goclaze' gote'ne', perw Daviden' bcuasen' chop ni'a cont bi gocde' zi'. Saúlen' gocbe'ede' bich chaclen Diosen' le' san chaclene' David, da'nan' bžebe'ne' na' bzoe'ne' gwlo'o lo ne'e to xonj soldadw, le gocde' še bene' ca' chesegue'ede'

bene' Israel ca' yesote'ne' cate' ga šeje' lao yela' gwdile. Perw Daviden' bechoje' güen yogo' ni'a cate' gweyeje' yela' gwdile, le goclen Diosen' le'. Da'nan' bžebch Saülen' le', perw yezica'chle bene' Israel ca' gosacde' Daviden'.

Gwdechle Saülen' bene' xbab nac gone' cont bich le'ede' David. Gwzoa to xi'ine' no'ol bi' bzebe, gože'be' Mical. Bi' nga gwdanlaže'be' ca'a David lebe'. Nach bšabe'be' cont ca'a Daviden' lebe'. Gwdiljwlaže' nac bene' cont bene' güen žin che' ca' gosego'oyele' Daviden' si' lo ne'e bi' che rey. Gague cate la' goclaže'te Daviden', perw gose'ene':

—Toz da' chaclaže' rey cont gac lo nao' xi'inen', goto' to gayoa bene' filisteos ca'.

Saülen' ba chgue'ede' Daviden' na' bene' xbab bene' filisteos ca' yesote' Daviden' cont bich le'ede'ne', da'nan' gwe' Daviden' cheyala' gote' to gayoa bene' filisteos. Daviden' bebede' gwzi' lo ne'e gone' can' gwna reyen', nach gweyeje' jetue' bene' filisteos ca', na' gague to gayoazen' jetue', san chop gayoa bene' ca' betue'. Beyoža' bšagna' Daviden' len Mical. Saülen' bžebche' Daviden' ca' bate'teze, le gocbe'ede' Diosen' chaclenchgüe' Daviden', na' lecze ble'ede' do laže'cze xi'inen' chacde' Daviden'.

Nach da' yoble bečhoglaže' Saülen' gote' Daviden', na' gož bene' lo' yo'o chen' len bene' güen žin che' ca' can' nac xbab chen'. Nach xi'ine' ben' gože' Jonatán leca güen gwzoe' len Daviden', na' gože'ne' can' nac xbab che xen'. Gwdechle Jonatánna'

gwlo'oyeŀe' xen' gože'ne' bi cheyaŀa' gone' xbab gote' Daviden'. Bzebte bečhoglaže' rey bi gote'ne'. Can' goc, Daviden' benche' žin len soldadw che Saúlen', na' cate' btiŀe' bene' filisteos ca' da' yoble, yetŀi'a bene' gan.

Gwdena', da' yoble gwyo'o gwyaz da' xigüen' lo' yichjlaždao' Saúlen', na' gwdiŀ arpa che Daviden' cont bzenag rey, perw da' yoble bzaŀa' reyen' yag dan' zoa to ya toše' lagüenna', goclaže' gote'ne'. Daviden' bele' na' bxonjde' rey, beze'e beyej liže'. Na' no'ol che', ben' gože' Mical, gože'ne' cheyaŀa' gwxonje' lo že'na' še bi che'nde' got xen' le'. Caten' za' gože'ne' ca' bačhle gwseŀa' Saúlen' bene' zan bene' ja'ac güia güena' liž Daviden'. Nach Micalen' boŀetje' Daviden' to lo ventan gan' bi nŀa' cont boxonje'. Micalen' ľecze bcue'e lache' lo cama' benen' ca to bene', beyoža' bguacuen' lache'chel cont gosacde' David nan' de' lo cama'. Cate' goso'o bene' güen žin che Saúlen' cont yeseche'e Daviden' liž rey Saúlen', Micalen' gože'ne' bi gac se'e, le che'ede'. Gocch yešlož, gocbe'e rey benŀe xi'inen' le'. Ľeca bloque'be' na' gwdiŀe'be', perw benŀaže'be', gožbe'ne':

—Daviden' gwne' gote' neda' še bi gaclena'ne' yele'.

Šlac na', Daviden' bele' na' jane'e Samuel, na' gože'ne' yogo' can' goca'. Saúlen' beyiljue' David perw bitw beželde'ne'. Na' Daviden', dan' ľeca güen gwzoe' len Jonatánŀa', da'nan' gwyeye' jašague'ne' na' gwŀabde'ne':

—ĽBixchen' chloc xeon' neda'?

Jonatánna' boži'e xtižen' gože'ne' bi naquen ca'.
Perw Daviden' gwne':

—Da' li chloque' neda', perw bina' ye'e le' ca', le
nezde' nita'cho güen.

Nach Daviden' gwnabde' Jonatánna' šeje' güia
güena', yeyoža' šjayeže'ne' bin' chac. Na' gwchebe'
šeje' güia güenan', yeyoža' šjayeže'ne' yogo' da' le'ede'.
Ca' goc, Jonatánna' gocbe'ede' da' li xen' chaclaže'
gote' Daviden'. Nach beyeje' jayeže' Daviden' dan'
ble'eden', perw bsaque' cont nono gocbe'e. Laczla'
gota' da' zeden' nac qui, chope' gosego'o cho'e
bate'teze yesenite' güen na' yosogüia yesena' bene' lo'
yo'o che lježe' cate' bi chesac chegaque'. Beyoža'
beza' Daviden' latja', le gocbe'ede' cheyała' gwxonje'
cont bi yesote'ne'.

87. Daviden' bxonjde' rey Saúlen', na' bene' zan gwzolao gosede'e le'

(1 Samuel 21 — 23)

Caten' chda David chxonjde' Saúlen', gwyeye'
jane'e bxoz ben' gože' Ahimelec na' gwnabde'ne'
yetextil. Ahimelecná' bebande' dan' gwyej toz
Daviden', na' gwnabde'ne' bixchen'. Daviden' benlaže'
gože'ne' zeje' to mandadw che rey Saúl da' nono gac
neze. Nach gož Ahimelequen' le':

—Bich bi yetextil yoble zjade, lete dan' zjanac lo
na' Dios dan' gosecua' lo mes dan' ze lo' yodaon'.
Yetextil qui, bxoz ca'ze zjade latje yesagüen', perw

Ahimelequen' bnežjuen' beyoa' Daviden' len cont
jaydagüen' len bene' ca' zjanita' chesebeze'ne'.
Daviden' lecze gwnabde' Ahimelequen' še bi nape' to
spada do na' da' gwchine'. Nach Ahimelequen'
bnežjue'ne' spada dan' goc che Goliat. Beyoža'
Daviden' beyo'e da' qui na' gwze'e Israelen' nche'e to
xonj bene' byo ben' goseda' le'.

Zgua'tec gwyeje' to ciuda che bene' filisteos ca' da'
nzi' Gat, perw bene' lo ciudan' besyeyombi'ene'. Na'
Daviden' bžebe' got rey che ciudan' le', da'nan' bene'
ca bene' chactont cont goso'e latje beze'e beyeje' ga
yoble. Nach beyeje' ga ze to bloj da' nzi' Adulam.
Cate' goseneze bene' lo' yo'o chen' zoe' na', ja'aque'
jasešague'ne'. Lecze zan bene' gosone' Daviden' txen
no bene' gosata' da' zed chegaque' len rey Saülen', len
bene' še bi da' chesale' o bi da' zed yoble gosata'
chegaque'. Can' goc, besedobe' gosaque' ca do tap
gayoa. Lecze gwche' xaxna' Daviden' cont bibi yesac
che', na' bzoe' legaque' len rey che Moab. Nach to
ben' be' xtiža' Dios ben' gose'e Gad gože' Daviden'
cuejyichje' bloj gan' zoen' na' yeyeje' yiçe' ga mbane
bene' ca' zjanc diaža che da' Judá.

Šlac nga, Saülen' goclaže' sene' Daviden', perw bi
gota' latje. Lecze bloque' xan soldadw che' ca' dan'
bi goso'e diža' catec güen zoa Daviden' len Jonatánna'.
To bene' Edom zoe' lo' yodao' dan' chacte chedobe
caten' gwnab Daviden' yetextil len spada, na' le' jaye'e
diža' len Saülen' yogo' can' goca'. Nach reyen' goxe'
Ahimelequen' na' gwdile'ne' dan' goclene' Daviden'.
La'czla' Ahimelequen' bzejni'ide'ne' goclene' Daviden'

neche goque' bene' güen žin che rey, Saúlen' bia'cze bene' mandaw gosote' Ahimelequen' len yogo' b̥xoz che lo yeža', len yogo' bene' lo' yo'o chegaque', lente bi' che' na' beyixe' chegaque'. Toz xi'in Ahimelec bela, ben' gože' Abiatar, nach len' gwyeye' jaydiljue' Daviden' cont gože'ne' can' goquen'. Na' Daviden' gože'ne':

—Še Saúlen' cheyljue' chopcho cont gote' chio', yejñi'a bega'an len neda'.

Ca' chac cate' bene' filisteos ca' goso'e to ciuda che Israel da' nzi' Keila, gosediłlene' bene' že' ciudan'. Na' Daviden' gwyeye' nche'e bene' ca' zjada' le' goclene' bene' Keila ca', na' Diosen' goclene' legaue' gosone' gan lao bene' filisteos can'. Saúlen' gwneзде' zoa Daviden' ciuda da' nzi' Keila, na' bene' xbab nacle gone' šjaxe'ne'. Nach Daviden' gwnabde' Diosen' bi cheyał'a gone', na' Diosen' gože'ne':

—Saúlen' chsini'a che' yide' Keila nga, na' bene' qui yesone' le' lo na' rey.

Can' goc, Daviden' len bene' che' ca' besyežaše' lo ciudan' na' gosaše' nile na'le. Cate' gwneze Saúlen' ba beza' Daviden' lo ciudan', bich bene' xbab šjaxe'ne'. Šlac na' ba nac ca do xop gayoa bene' zjade'e Daviden'.

Saúlen' beyiljwche' Daviden', perw Diosen' bi bi'e latje yeželde'ne'. Na' goc to ža Jonatánña' gwyeye' jaydiljue' Daviden' багаše'ze, na' gože'ne':

—Bitw žebo' David, xan' bitwbi gac gonde' le'.
Nezda' gwžin ža gaco' rey cob čhe Israelen', na' neda'
gaca' xan bene' güen žin čhio' ca'. Lecze ba nezecze
xan' can' gaquen'.

Nach da' yoble Daviden' len Jonatánna' gosogo'o
cho'e batte'ze yesenite' güen. Beyoža' Jonatánna' beze'e
beyej liže', na' Daviden' gwdache' bcuaše' do ya'a
yegw ca'. Perw cate' bene' ca' zjanita' gała'ze
gosenezde' do na' chde', bosošab cuine' yesaclene' rey
Saúlen' yesezene'ne'. Cate' gwneze Daviden', gwčhe'e
bene' čhe' ca' besyeya'aque' na'le, perw rey Saúlen' len
soldadw čhe' ca' jasa'aque' jasa'ogüe'ne', na' yelate'ze
ca' jasyexene'ne'. Ca' chac cate' bžin to bene' noa'
rson čhe' rey Saúlen' na' gože'ne' bene' filisteos ca' ba
cheso'e Israelen'. Cana'ch bich gwyeye' ga'ogüe'
Daviden', san bebi'e jaydillene' bene' filisteos ca'.

88. David čhop ni'a bosle' rey Saúlen' cate' gota' latje gote'ne'

(1 Samuel 24 — 27)

Beyož gwdillen rey Saúlen' bene' filisteos ca', da'
yoble gwčhe'nagüe' Daviden'. Cate' gwnezde' do ga
zoa Daviden' na' gwyeye' cont šjete' le', nčhe'ete šon
mil soldadw čhe'. Na' Daviden' len bene' ca' zjanac
le' txen zjajo'e chosocuaše' to xan bloj dedte da' ze
do latja'. Na' Saúlen' gwyo'e lo' blojen' gwyeye' güeža'
güiš, neca gocbe'ede' na'yane'cze yo'o Daviden'. Bene'
ca' zjanac txen Daviden' gose'ene':



Daviden' bi goclaže' gote' Saúlen', con jabigue' cuiten', neca
bene' sšag, nach gwchogue' len spada ghen' late' cho'a
lache' dan' xoa cože' rey Saúlen' sin cbi gocbe'e reya'.

—Na'a de latje, betwttega reyen'.

Perw bi goclaže' Daviden', le Saúlen' ne' naque' rey
che Israelen' na' Daviden' bene' xbab naque' ben'
gwlej Diosen' chnabi'e legaque'. Toz da' bene',
jabigue' cuiten', neca bene' sšag, nach gwçhogue' len
spada çhen' late' cho'a lache' dan' xoa cože' rey
Saúlen' sin cbi gocbe'e reya'. Beyož bechoj Saúlen'
xan blojen' beza'lene' soldadw che' ca', cana'ch bechoj
Daviden' na' bosye'ene', na' bsaque' gwzie' ga nac to
liča len rey. Cate' gwca'a yen reya' gwne'e non'
chne' le', Daviden' byaçhoe' godo'te loxguen' lo yo, na'
blo'ede'ne' late' lache' dan' gwçhogue' dan' xoa cože'
rey. Beyoža' gože'ne':

—Gota' latje gota' le', perw bi benan'. Na' Diosen'
gwdelaže' nochon' nap doļa'.

Cate' bene' Saúlen' can' gwna Daviden', leca
gocyaše'laže', na' boži'e xtižen':

—Le' bitw napo' doļa' David. Neda' napa' doļa'
dan' chonda' le' mal. Tgüejga chle'echo bene' chon
güen len to bene' chgue'e le' can' beno' len neda' bi
beto' nda'. Dios gaclene' le' da' boslao' neda'. Nezdā'
le' gaco' rey cob, na' Israelen' gwze çhen na' gac da'
šagüe' da' güen šlac le' nabi'o. Perw gwlo'o cho'o
lagua' nga gaco' bene' šagüe' len bene' lo' yo'o chia'.

Daviden' gwzi' lo ne'e gonen', nach beza' rey
Saúlen' beyej liže'. Perw Daviden' len bene' ca'
zjanac le' txen besyega'ane' bosocuaše' do lo ya'a
na'ze.

Gague goc sša na' got ben' be' xtiža' Dios ben' gose'e Samuel. Beyoža' bene' Israel ca' besyeyaše'laže' na' gosezoe' yela' güine'.

Lecze do cana', Daviden' gwsele' to chop bene' ca' zjanac le' txen, jase'e to bene' byo gože' Nabal, gwnabe' gwnežjue'ne' da' yesagüe'. Nabal nga goque' leca to bene' gwni'a na' do cana' chšib xila' che' ca'. Daviden' gože' bene' ca' gwsele' šjasyese'ede' laže' ca' güen gosone' len bene' güeye xila' che Nabalen'. Cate' goson xišne'e gała'ze ga non xišna' Daviden' len bene' ca' zjanac le' txen, bitwbi gosone bene' ca' zjanaque' txen len Daviden' legaue', neca goso'e latje šjaseca'a nochle bene' yoble bi da' de che Nabalen'. Perw cate' gose'e Nabalen' ca', boži'e diža' xi'a len legaue' na' bitwbi bnežjue'ne'. Nach bloc Daviden', le bi ben Nabalen' banez can' goson bene' ca' zjanac Daviden' txen gosapši'e bene' güeye xila' chen'. Nach ben Daviden' mandadw yososi'a chegaue' cont šja'aque' šjasedillene' bene' ca' že' liž Nabalen' cont yeseque'e da' de che'. Nabal nga gwzoa to xo'ole' gože'ne' Abigaíl. Gocchgüe' xdan, na' lecze goque' yičhj yaš. To bene' güen žin chegaue' ca' gože' Abigaílen' can' goca', na' cate' gwnezde' can' boži'i Nabalen' xtiža' Daviden', bene' xbab šeca naquen güen bi da' sele' lao Daviden' cont yeyoe'xene' le' na' bi loque' legaue'. Da'nan' btobe' da' zcha'o bi da' yese'ej yesagüe', bgüe'en to xonj burr na' gwyeye' jašague'ne'. Cate' bežague'ne', bi'ene' da' ca' nse'en na' gože'ne' yejni'a si' lo ne'e da' ca' nse'en clel ca' cuie' xya gote' Nabalen' len bene' ca' zjanita' ližen' neghe da'



Abigaîlen' btobe' bi da' yese'ej yesagüe', bgüe'en to xonj
burr na' gwyeye' jašague' Daviden' cont beyoe'xene' ðe' na'
bich bloque' ðegaque'.

ngo'olaže' can' boži'i Nabalen' xtižen'. Daviden' gocbe'ede' zejeczzen can' gwna Abigaílen', nach gwzi' lo ne'e da' ca' bnežjue'nen'.

Bina' gacle šino' ža cate' got Nabalen', na' Daviden' gocbe'ede' Diosen' gwčhogbi'e gac che' ca' yeļa' bene' xi'a che'. Nach Daviden' bolgüiže' no'ola' še guaclaže' yeque'ene'. No'ola' goclaže' na' bosyošagne'e. Daviden' bšagna'lene' čhope no'olen' šlac boxonje' liž rey, toe' Abigaíl nga na' yetoe' gose'e Ahinoam. Na' Mical ben' goc xo'ole' nechw, Saúlen' bene'ne' lo na' bene' byo yoble.

Goc šlož na' Saúlen' bše'e ca bene' xbab, na' da' yoble gwche'nagüe' gote' Daviden'. Btobe' šon mil bene' na' gwyeje' jaydiljue' Daviden'. Perw Daviden' gwseļe' to čhop bene' ja'ac güia güena' cont jasyediljue' gan' zjanon xišna' soldadw che rey. Beyoža' gwyeje' len yeto bene' yoble gan' non xišne'en. Diosen' bene' cont leca gosetas yogo' bene' che rey, ne to nono gocbe'e cate' goso'e gan' zjanon xišne'en. Ben' zejlen Daviden' goclaže' gote' Saúlen', perw Daviden' bi bi'e latje, gože'ne' Diosen' gwžie' bia' bi gone' che Saúlen'. Toz da' gosone', goso'e xguag nis na' yag ton dan' zoa ya toše' che Saúlen'. Beyoža' jaya'aque' ga zelao nac sib to lo ya'a da' zoa late' zito'. Lo ya'a na'ate zjanite' cate' bosya'a Daviden' bolgüiže' Abner ben' goc xan soldadw che Saúlen', na' benļe' che', gože'ne':

—Cheyała' gapcho' reyen' binlo, le še yeyiljo' yag ton dan' zoa ya toše' lagüenna' na' len xguag nis che rey, bi yeželdon', le bibi zjade na'.

Cana'ch Saülen' beyombi'e ši'i Daviden' na' bolgüiže'ne'. Na' Daviden' boži'en, gože'ne':

—Ne tni'a bitwna' gaclača' gona' da' mal len le'. Da'nan' bi chejni'ida' bixchen' na'oguo' neda' chaclažo' goto'nda'.

Nach rey Saülen' gwnabe' yezi'xen Daviden' che'. Beyoža' Daviden' gože'ne' sele' to bene' šjayxi'e yag ton che' dan' zoa ya toše' lagüenna'. Lecze gwne':

—Diosen' gapši'e neda' can' gwdapši'a le' na'aža.

Nach beza' Saülen' beyej liže', na' Daviden' bebi'e len bene' ca' gosac le' txen. Perw Daviden' bich ben lagüe' Saülen', da'nan' beyeje' da' yoble lo' ciuda che bene' filisteos da' nzi' Gat, beče'e chop xo'ole' ca' na' len bene' ca' gosac legaque' txen. Cate' gwneze Saülen' bich gweyeje' ga'ogüe'ne'. Daviden' gweyeje' lao rey che ciuda da' nzi' Gat janabde'ne' gwnežjue' to latje ga yesenite'. Na' rey che Gaten' bnežjue'ne' to ciuda dao' da' nzi' Siclag. Nga gwzoa Daviden' nde tgüiz. Nach Daviden' len bene' ca' gosac le' txen gwzolao besežaše' jasa'aque' jasene' gwdił len ciuda ca' gan' goseže'e bene' besegue'ede' bene' Israel ca', na' cate' beyož gosote' bene' ca' gosediłlene' na' besyega'anlene' no xalane' na' beyixe' chegaque'. Daviden' benlaže' lao rey ben' gwnabia' Gat, gože'ne' chdiłlene' bene' ca' zjaže' ciuda che Israel na' len bene' ca' zjade'e bene' Israel ca'. Da'nan' bene' xbab

Daviden' chgue'ede' bene' Israel ca' na' bi gocbe'ede'
še chaclencze' bene' Israelen'.

89. Rey Saúlen' len bi' che' ca' gosate' to lao yela' gwdile

(1 Samuel 28 — 31; 1 Crónicas 10)

Lecze do cana' bene' filisteos ca' bosotobe' zan
soldadw cont ja'aque' jasedillene' bene' Israel ca'. Na'
rey che ciuda da' nzi' Gat goclaže' Daviden' len bene'
ca' zjanac le' txen yesaque' toze len soldadw che
bene' filisteos ca' cont šjasedillene' bene' Israelen'.
Na' Daviden' gože'ne' guaccze.

Šlac chosotob ljež bene' filisteon' cont šjasedillene'
bene' Israelen', Saúlen' lecze btob soldadw che'. Cate'
ble'ede' leca bene' zan zjanac bene' filisteos ca',
bžebchgüe' na' gwnabde' Diosen' gwlo'ede'ne' nacyanēn'
gac. Perw Diosen' bitw boži'e xtižen'. Neca boži'en
lo yel bišgal, neca boži'en cate' bghine' yej ca' dan'
zjazaca'chgua dan' bosozaļe' cate' bi da' chesende'
yesenezde' nac yesone', neca boži'en len bene' ca'
gosoe' xtiža' Dios. Nach Saúlen' jane'e to no'ole
güeneya'a ben' cholgüiž bene' ba gosat, cont ye'ene' bi
cheyala' gone'. Cana' ba btaš Saúlen' bene' güeneya'a
ca' goseže'e Israelen' da' gwneзде' Diosen' bi chazlaže'
bene' gwneya'an', perw bene' güen žin che' ca'
gose'ene' ne' chega'an yeto no'ol bene' chac cholgüiž
bene' guat, na' zoe' lo ciuda da' nzi' Endor. Nach
Saúlen' bša' xalane' gwzoe' nža'le cont nono beyombia'
le', na' gwyeye' jane'e no'ola'. Benga bich chaclaže'

yolğüize' bene' ba gosat, le bžebe' neze rey Saülen'
ne' chone' dan' nac ca' na' gone' mandadw yesote'ne'.
Perw Saülen' gota'yoede'ne', gože'ne' bitwbi gac che',
na' gwnabde'ne' yolğüize' spiritw che da' Samuel.
Nach bzenague' che' na' bolğüize'ne'. Cate' no'ola'
ble'ede' da' Samuelen', la' gocbe'etede' cuincze rey
Saülen' chi'lene'. Nach Samuelen' gwnabde' Saülen':

—¿Bixchen' chono' neda' zed?

Saülen' gože'ne':

—Da' zed xen de chia', le bene' filisteos ca'
chesone' gwdile len neda', na' Diosen' bi choži'e
xtižan'. Da'nan' chñia' le' cont nao' bi cheyała' gac.

Na' Samuelen' gože'ne':

—Bitwbi gaclenen le' dan' gwnabdo' neda'. Diosen'
bich chle'ede' le' güen. Ba chže'e le' dan' bi bzenago'
che' caten' bžie' bia' goto' yogo' bene' amalecitas ca'.
Can' ba gwnicza', Diosen' bich güe'e latje gaco' rey.
Gwxę bene' filisteos ca' yesone' gan gwdila' na' le'
len xi'ino' ca' gatle.

Saulen' leca bžebe' cate' bende' da' nga.

Cate' ba besedobe soldadw che bene' filisteos ca',
rey che to to ciuda chegaque' gose'e rey che ciuda
da' nzi' Gat:

—Bi cheyała' go'o latje gon Daviden' txen len
chio', nęca bene' ca' zjanac le' txen.

Besežebe' še do lao yęła' gwdila' yebix Daviden'
na' gaclene' bene' Israel ca'. Nach gosone' byen boži'i

rey ɕhe Gaten' Daviden' len bene' ca' zjanac le' txen
jaya'aque' Siclag.

Ca nac bene' filisteos ca', beyoż bosyoži'e Daviden'
len bene' ca' gosac le' txen, legaquer gosone' gwdił
len bene' Israelen', na' gosone' gan gwdiła', na' bene'
Israelen', leca zane' gosat. Lecze ja'aque' jasa'ogüe'
Saülen' len xi'ine' ca', na' gosote' legaquer. Can' goc
got Saülen' dan' bi bzenague' ɕhe Diosen' na' dan'
janabde' to no'ol cholgüiż bene' guat.

90. Gosone' Daviden' rey gwchop ɕhe bene' Israel

(2 Samuel 1 — 6; 8 — 10; 1 Crónicas 11 — 16;
18 — 20; 26:29 — 27:34)

Beyoż gosot bene' filisteo ca' Saülen', gwyey to
bene' güede diža' lo ciuda da' nzi' Siclag, na' gože'
Daviden' yogo' can' ba goca'. Cate' gwneze Daviden'
ba got rey len xi'ine' Jonatán, leca gocyashe'laže', na'
bzoje' to da' gosole' ga chgualan' legaquer, le
güenchgua gosenite' len Jonatánna', na' be'e yela'
bala'an ɕhe Saülen' da' goquer rey nechw ɕhe Israel.
Beyoż gwzoe' yela' güine' chegaquer, Diosen' gože'
Daviden' yeyeje' ciuda da' nzi' Hebrón gan' mbane
bene' ca' zjanac diaža ɕhe da' Judá, le lecze naquer
diaža ɕhe Judá. Daviden' beyeye' na', na' bene' Judá
ca' bosozoe' set yichje' na' gosone'ne' rey ɕhe Judá.

Ne' mban Abner, ben' goc xan soldadw ɕhe rey
Saúl, nach le' gwleje' to xi'in da' rey Saülen' ben' bi

got, na' bene'ne' rey che bene' Israel ca' yezica'.
Benga gože'ne' Is-boset. Na' goc, to ža ben' goc xan
soldadw che Daviden', ben' gože' Joab, na' Abner ben'
goc xan soldadw che Is-boset, bosotiļ soldadw
chegaquen', perw soldadw che Davidna' goson gan
gwdiļa'. Bene' ca' gosac Daviden' txen jasa'ogüe'
soldadw che Is-boset cate' gwxiñch, na' šlac zja'aque'
zjanlague' legaque', Abner betue' Asael ben' goc bene'
biše' Joab. Zan bio' gosediļe soldadw che Daviden'
len soldadw che Is-boset, perw Daviden', tža tža zej
gwyanch bene' gosac le' txen.

Goc to ža, Is-boset gwdiļe' Abner, gože'ne':

—¿Bixchen' gota'lenu' to no'ol ca' gwzoalen da'
xan'?

Leca bloc Abneren' dan' gože'ne' ca', na'
bečhoglaže' gaclene' Daviden'. Da'nau' gwsele' bene'
jasesan diža' še guac gaque'ne' txen. Daviden'
gože'ne':

—Guaccze, perw še le' len Is-boset yeyonle Mical
ben' goc xo'ola' nechw.

Abneren' na' Is-boseten' gosechebe' yosyonežjue'ne'
na' beyož bosyonežjue'ne' no'ola', da' yoble gwyej
Abneren' jane'e Daviden' gože'ne' guac si' lo ne'e
co'oyeļe' yogo' bene' gole blao che Israelen' cont
yesaque' txen len Daviden'. Daviden' gocde' naccze
güen xbab che Abneren' na' bi'e latje zjayde' binlo.

Cate' bežin Joaben' beyož jene' gwdiļe len bene' že'
to ciuda, gose'ene' ben Daviden' güen len Abneren' na'

bi'e latje zjayde' binlo. Leca bloc Joaben' can' benen', perw ne to bibi gože' Daviden', san con gwsele' to chop bene' güesan diža' cont jaseže' Abneren' yebi'e na' yosošalj chopze'. Nach cate' besyega'an chopze', betue'ne'. Bene' ca' cont bezi'e gwzon Abneren' dan' betue' bene' biše' ben' gose'e Asael cate' besyežague' lao to yela' gwdile.

Cate' Daviden' gwnezde' Joaben' betue' Abneren', leca bloque' na' bene' mandadw yogo' bene', lente Joaben', yesezoe' yela' güine' ca' nac dan' goca'. Can' goc, yogo' bene' gosacbe'ede' bibi neze Daviden' len ben' betw Abneren'.

Cate' Is-boset gwnezde' ba got Abneren', leca bžebe'. Gague goc sša, chop xan soldadw che' ca' gosote'ne' šlac chtase', na' jasesane' yichjen' lao Daviden', le gosacde' yebe Daviden' dan' ba got ben' chnabia' yezica'chle bene' Israel ca'. Perw Daviden' gože' bene' ca' zjanac le' txen yesote' bene' ca' gosot Is-boseten', le malen' gosone'.

Beyož got Is-boseten', yogo' cuen bene' Israel ca' besyeyaque' txen len Daviden'. Besyedobe' gan' nzi' Hebrón na' gosone'ne' rey cob che doxen Israel. Cana' ba goc gaž iz yogašje naque' rey che Judá, na' gwdena' goque' rey gwnabi'e doxen Israelen' lao yeši'inechoa iz.

Rey Daviden' na' yezica'chle bene' Israel ca' gosaclaže' Jerusalénna' cue' bene' nabia' doxen Israelen', perw zgua'tec cheyała' yesote' bene' jebuseos ca' zjanita' na'. Gosac che' güen goso'e bosolane' ga

zjanonšagüe' bene' jebuseos ca' ga chosocue'ej cuine'
 cate' chesone' gwdiŕe, na' gosone' legaque' gan.
 Beyoža' bososi'en ciuda che David. Diosen' goclene'
 Daviden' na' zej gocche' bene' blao. Yeto da' goc,
 gwzoa to rey ben' gwnabia' Tiro, ben' gože' Hiram,
 na' benga cuent che' gwseŕe' yagla' na' gwseŕa'tie'
 bene' goson žin cont Daviden' bene' to yo'o xen ga
 gwchi'e gwnabi'e. Nach gocbe'e Daviden' da' ŕicze
 Diosen' chaclene'ne'. Lo ciuda Jerusalenna' Daviden'
 gwxi'e yeto chope no'ol gosac xo'ole', na' bži'e yexonj
 no'ole liže' bene' gata'lene' perw bi bšagna'lene'
 legaque', le ca' gosoncze rey ca' cana', na' leca gwyān
 xi'ine'.

Cate' goseneze bene' filisteos ca' Daviden' ba naque'
 rey che doxen Israel, gosone' gwdiŕe len bene' Israel
 ca' chop ņi'a, perw Daviden' len soldadw che' ca'
 gosone' legaque' gan chopte ņi'a, le Diosen' goclene'
 legaque'.

Beyož goc da' qui, Daviden' bečhoglaže' šjayxi'e caj
 gan' yo'ošagüe' yej ta'a ca' gan' byoj ley che Dios
 cont yežinen Jerusalenna', nach btob soldadw che' ca'
 cont ja'aque' ciuda da' nzi' Quiriat-jearim gan' gwxa
 cajan'. Gosegüe'e cajan' to lo carret na' besyeya'aque'
 zjaya'aque' Jerusalén. Yogüe' zjaya'aque' chesoŕe' na'
 chosoye'e. Cate' besyežine' to latje ga gosečhego' go'n
 ca' zjanxob carreta', nach to bene' zjayda' cože'
 carreta' bago bli taque', goclaže' goxe' cajan' cont bi
 lažon' lo yo, perw Diosen' bene' gote' dan' bcheŕe'
 caja. Nach leca besyegüine' bene' ca' yezica'. Da'nan'
 besyeyo'e cajan' jasyesanen' to yo'o da' zoa gaŕa'ze,

bich besyeyo'en Jerusalén. Gwdena' Diosen' bene' goc
leca güen che ben' nac xan yo'o neche gwxa cajen'
ližen'.

Gwdechle, Daviden' goclaže' šjayxi'e caj gan'
yo'ošagüe' ley che Dios cont xuan Jerusalén. Cani'ch
bene' can' gož Diosen' bene' Israel ca' cheyała'
yesone': bene' ca' zjanac diaža che da' Leví gosoe
cajen' gosexoan yaxiçhje'. Ca' gosoen besyežintie'
Jerusalén, na' da' yoble šlac zjangüe'e nez bene' ca'
yezica' zja'aque' chesoļe' na' chosoye'e. Cate'
besyežine' Jerusalénna' gosexoašagüe' cajen' to lo' yo'o
de lache', na' gosonxene' Dios gosote' zan beyixe'.
Nach Daviden' güe'ej gwdagwlene' txen yogo' bene' ca'
zjaže' lo lñin'. Beyoža' yogüe' jaya'ac ližgaque'. Cate'
bežin liž Daviden', xo'ole' ben' gože' Mical
gwzi'diže'ne', gože'ne':

—Bya'o ca bya'a bene' le' bene' tont.

Perw Daviden' boži'e xtižen' gože'ne':

—Bya'a che Dios, le leca chebeda' ca nac yogo'
da' güen ba bene' len nación Israel nga.

Na' Diosen' gwçhogbi'en bi nita' xi'in no'ola' neche
dan' gwne' ca'.

Nach Daviden' gwleje' bene' byo ca' gosalje' lo
diaža che da' Leví çhop šon cuen cont gosape' yo'o
de lache' gan' gwxašagüe' caj gan' yo'ošagüe' ley che
Dios dan' byojen le'e yej ta'a. Baļe' gože'ne':

—Gwcuežle stroment.

Baļe' gože'ne':

—Golje.

Yebaļe' gože'ne':

—Na' güiale cho'a yo'on.

Bene' ca' gosac b̄xoz na' yeto ̄chop bene' goc diaža ̄che da' Leví, gože'ne' yesyega'ane' Gabaón, ̄le caten' gocte Saúlen' rey, Gabaón na'ate bosozoe' yodao' dan' chacte chedob dan' gosone' caten' gwnabia' Moisés.

Daviden' zan gwdiļ bene', na' yogon' bene' gan. ̄Lecze gwnabi'e ca cheyaļa' na' bitwbi da' zed gwche'. ̄Lecze jayze'ede' ca nac dan' gwlo'o cho'e len xmigüe' Jonatán. Da'nan' beyiljwyože' še nita'ch bene' diaža ̄che Saúlen' cont gone' güen len ̄legaue', na' beželde' to xi'in Jonatán gože' Mefi-bozet. Goque' to bene' coj. Nach bēche'ene' cont gwzoe' liže' na'cze. ̄Lecze b̄ghine' baļ bene' ca' goson xšin Saúlen' cont gosone' žin yežlio ̄che Mefi-bozet.

91. Diosen' gwne' gone' güen len Daviden'

(1 Samuel 7; 1 Crónicas 17)

Cate' gwzolao chnabia' Daviden', cate' za' gwyate doxen yo'o gan' cui'e nabi'en na' bāch beyož bene' gan yogo' yež ca' chesegue'e Israelen' zjachi' cue'ej cuitenna', nach goxe' ben' choe' xtiža' Dios ben' gose'e Natán, gože'ne':

—Chaclaža' gona' to yodao' ̄che Dios. Chacda' bi n̄lo'en güenna' xoašagüe' caj gan' yo'ošagüe' ley ̄che

Dios to lo' yo'o de no lache'ze šlac neda' zoa' to lo' yo'o güen.

Natánna' boži'e xtižen' gože'ne':

—Naccze güen xbab ċhion', guaclencze Diosen' le' gonon'.

Perw lo' že'na' Diosen' gože' Natánna':

—Gwyej jež Daviden' gague le' gone' yodao' ċhian'. Neda' ba zoacza' to lo' yo'o da' chacte chedob cate' besyežašte bene' Israel ca' Egipto. Ne tñi'a cana' nab to liža'. Lecze gože' neda' gwleja'ne' cate' naque' to bene' güeye xila'ze, na' neda' bena' naque' rey ċhe bene' zjanac nación ċhia'. Neda' zoacza' len le' na' ba goclena'ne' cont bene' gan cate' bene' gwdil len bene' ca' besegue'e le'. Lecze che'nda' co'o choa' to da' gona' len le'. Gona' gague' to bene' blao na' zechgua ċhe'. Bene' Israel ca' gona' lo' ne'e latje nga cont toli tocanē yesezoe' lagüenna', neca bi da' zed yesebec bene' xi'a len legaue'. Bene' lo' diaža ċhe Daviden' bate'teze gwzoacza'ne' yesaque' rey ċhe Israel. Bitw gwša'a ca chona' xbab len legaue', bi yapa'ne' bich yesaque' rey, can' bena' len Saúlen'. Še bi da' xinj yesone', ċhogbi'an bi da' yesa'le'de' con ca choncze to xa bi' bixjw cate' bi da' xinj cheson bi' ċhe' ca'. Cate' gat Daviden', to xi'ine' ca' gac rey, na' gona'ne' to bene' blao. Bena' gone' to yodao' ċhia'.

Beyeċhj ža, Natánna' gože' Daviden' yogo' da' qui. Nach Daviden' gwyeye' lo' yo'o dan' chacte chedobe gan' xoa caj gan' yo'ošagüe' yej ta'a ca' gan' zjanyoj ley ċhe Dios na' bolgüiže' Dios, gože'ne':

—Xana', neda' bi nezda' nac gona' gona' yela' choxclen chio'. Bene' lo' yo'o chia' ca' na' neda' bitw bi zaca'to' cana', na' na'a ba naca' rey che Israel. Yogo' da' qui naquen da' beno' le'. Da' li nacczo' bene' zaca'chgua. Toz le' zo' naco' Dios bene' zaca' gonxento'. Ba beno' da' guen len neto' bene' Israel da' zaca' ye^zejeto'. Neche nacto' lo' nao', boslao' neto' cate' bene' Egipto ca' gosone' neto' esclavos chegaque', na' lecze bešašo' bene' Canaán ca' latj nga cont benon' to latje ga gac soato'. Chata'yoeda' le' gono' da' ba ngo'o cho'o gono' len neda', cont ca' yesele'e bene' catec bene' zaca' naco' na' catec yela' guac nsa'o. Benšca ca' cont yesenezde' len' naco' Dios ben' chonxen neto' bene' Israel.

92. Rey Daviden' bene' to da' xinj, perw Diosen' bezi'xene' che'

(2 Samuel 11 — 12)

Goc tni'a, Daviden' gwsele' Joab ben' goc xan soldadw che' ca', gwyeye' jatillene' bene' amonitas ca', na' le' bega'ane' Jerusalén na'ze. Ba zoa gał chde' yi^{ch}jo'o che liže' cate' ble'ede' chazj to no'ole. Na' no'olen' leca xdan goque'. Nach benbyene gw^{ne}zde' no ben', na' gose'ene' naque' xo'ol ben' gose'e Urías. Benga gwyejlene' Joaben' jatillene' bene' amonitas ca'. Na' no'ola' gose'ene' Betsabé. Leca gwzelaže' Daviden' le', na' bene' mandadw jasexi'ene'. Cate' no'olen' bžine' liže', Daviden' gota'lene'ne'. Gague goc sša no'ola'

gocbe'ede' noa' xi'ine', nach gwsele' rson cont gwneze Daviden'.

Gague goclaže' Daviden' no neze še gota'lene' no'ol che Urías. Nach gwdiljwlaže' nac bene', gwsele' bene' güesan diža' lao Joaben', gože'ne':

—Che'nda' yeseło' Uríasen' Jerusalén ni cont ne' neda' nac zej gwdila'.

Can' goc, Joaben' besele' Uríasen' Jerusalénna'. Cate' bežinen', Daviden' gwṇabde'ne' nac zej gwdila'. Beyoža' besele'ne' šjayga'an liže' lo' že'na', le bene' xbab lo' že'na' gata'len xo'ol Uríasen', cont ca' yogo' bene' yesone' xbab bidaon' noa' Betsabé nacbe' bi' che Urías na' ne to nono neze can' nac dan' benen'. Perw Uríasen' bi beyej liže', san bega'ane' gwtase' cho'a liž reyen', latj gan' chesetas bene' güen žin che rey. Beyeḥj ža, Daviden' gwṇabde'ne' bixḥen' bi beyej liže'. Uríasen' boži'e xtižen', gože'ne':

—Chona' xbab bi nło'en güen šjayata' len xo'ola' šlac yogo' soldadw che Israelen' zja'aque' lao gwdile na' šlac caj gan' yo'ošagüe' yej ta'a ca' gan' zjanyoj ley che Dios x oan to lo' yo'o da' chacte chedobe.

Nach Daviden' bene' mandadw yega'ane' yetža Jerusalénna', goxe'ne' gosagüe' xše' txen na' bsožde'ne', perw Uríasen' bi beyejcze' liže' lo' že'na'.

Beyeḥj ža bich bežellaže' Daviden' nacle gone', con to da' goljlaže', gwsele' to cart lao Joaben' gože'ne' gwzoe' Uríasen' ga bi yele' lao gwdilen'. Ca' ben Joaben', na' gosote' Uríasen' lao gwdila'. Cate'

bžin ža bich gwzoa Betsabén' yela' güine' che bene' che', Daviden' gwsele' bene' jasexi'ene' na' bene'ne' xo'ole'. Na' cate' bžin žan', gwzane' bi' chen'. Perw Diosen' ble'ede' yogo' can' ben Daviden' na' bi gwyazlažen'.

Nach Diosen' gwsele' ben' gose'e Natán lao Daviden', be'lene'ne' xtižen'. Qui gož Natánna' rey:

—Zoa to bene' gwni'a ben' nape' leca zan beyixe'. Na' zoa yeto bene' nac bene' yaše', toz xila' dao' gwdape'. Leca gocde'ba', na' bende'ba' ca bene' lo' yo'o che'. Na' to ža gwyej to bene' blao liž bene' gwni'an', na' bene' gwni'an' goque' to bene' yičhj zoaba', cate' bsin'i'e da' gosagüe', gualaz da' got to beyixe' che' ca' cont gone' yela' guagon', gwyeye' jetue' xila' dao' che bene' yašen'.

Cate' bene Daviden' can' gwnen', leca bloque', na' gwne':

—Ben' ben ca' cheyała' yesote'ne'. Cheyała' čhixjue' xila' daon' gwlanen', yonežjue' taple xilan' gualazba'.

Natánna' gože'ne':

—Le' naco' ben' ben da' xinja' nactec ca'. Diosen' gwsele' neda' yapa' le', bene' le' rey na' gwdapši'e le'. Bene' latje zoaleno' zan no'ol ben' zjanac xo'olo', perw le' beto' Urías cont gwlando' xo'ole'. Nezeczeda' soldadw che bene' amonitas ca' gosot le', perw Diosen' nezde' len' beno' cont gosote'ne'. Zaca'lao bedabago' Dios na' ley che' ca'. Da'nan' sele' da' saca'zi'o. Güe'e latje yesyedile bene' lo' yo'o čhio' ca'

legacze' na' yesebecchgüe' da' zed laguon'. Lecze zaca'lao güe'e latje toe' yeyata'lene' xo'olo' ca'. Bitw goclažo' no neze dan' beno' len Betsabé, perw Diosen' güe'e latje yogo' bene' Israelen' yesenezde' can' gac ghion'.

Can' gož Natánna' Daviden', na' boži'e xtižen':

—Le can' naquen', bi bzenaga' che Diosen' na' bena' to da' xinjchgua.

Natánna' gože'ne':

—La'czla' beno' to da' xinjchgua, Diosen' bi gone' gato', perw bidaon' gwzan Betsabén', lebe' gat.

Beyoža' beza' Natánna' beyej liže'.

Gague goc sša, gwlen xgüe' bidaon'. Daviden' bene' gwbas na' bolgüiže' Diosen' neche lebe' lao to xman, perw gotcze bidaon'.

Beyož goc ca', gwza' Daviden' jašague' Joaben' len soldadw che' ca' gan' chesonche' gwdil len bene' amonitas ca', na' Diosen' goclene' gosone' legaque' gan da' yoble.

Gwdechle, Betsabén' gwzane' yeto bi' byo dao' na' gože'be' Salomón. Nach Diosen' gwsele' Natánna' gožgaque'ne' chacde' Salomónna'.

93. Absalón bedabaga' xabe' rey David

(2 Samuel 11:3; 13 — 15; 23:34)

To xi'in David gože'be' Absalón na' gwzoa to bi' zambe', toz xabe' na' toz xna'be', gože'be' Tamar. Tamaren' gocbe' leca xdan. Yeto xi'in Daviden' gože'be' Amnón, perw gague toz xna'ben' len Absalónna' na' Tamaren'. Amnónna' bdanlaže'be' bi' zan ziben' bin' gose'e Tamar, na' to ža benlebe' lebe' cont gwyey tozbe' lo' yo'o gan' chtasbe'. Lo' yo'o na' gwnizbe' lebe' gota'lembe' lebe'. Gwdena' bgue'ebe' lebe' na' bolagbe' lebe'. Cate' gwneze Daviden' can' ben bi' che' Amnón, bitwbi bende'be', le gocbe' bi' ngolte. Na' gwzolaon cana', Absalónna' bgue'e bi' biše'be' Amnón.

Gwde čhop iz, Absalónna' bembe' to lni xen, na' gox yogo' bi' biše'be' lente bi' biše' zibe' ca' šjasa'ache' llin'. Bembe' mandadw len bene' güen žin čhebe' ca', cate' sožech Amnónna', cana' yesote'be'. Ca' gosone', nach yogo' bi' che Daviden' yezica' besyebia bžina' čhegacben' na' bosyoxonjsesbe'. Absalónna' gocbe'ebe' ža'a Daviden' lebe' dan' betwbe' Amnónna'. Da'nan' sša gwza'be' Israelen' jaso'a len xta'obe' ben' goc xa xna'be'. Ba goc šon iz zoabe' na'le, cana'ch bich zoa Daviden' yela' güine' che bi' che' Amnónna'. Na' la'czla' Daviden' goclaže' yeyaxe' Absalónna', bi benen'. Nach Joaben' gwlo'oyele'ne' güe'e latje šjayxi'ebe'. Daviden' gwne' guaccze, perw lao yechop iz bi goclaže' šjana' Absalónna' le'. Goc

gayo' iz betwbe' bi' biše'ben' cate' bžin ža besyežague' na' rey Daviden' bguape' tiox xi'ine' Absalónna', na' Absalónna' ngo'olaže'be' dan' ba chac sša bina' yeyanlaže' xaben' dan' bembe'.

Absalónna' goczze' xdan, da'nan' yogo'ze bene' Israel ca' besyežejde'ne'. Can' goc bečhoglaže' Absalónna' yedabaga' xe' rey Daviden' cont žie' gague' rey cob che Israelen'. Btobe' to xonj bene' goson le' txen na' gwzolao chzie' yogo' ža cho'a ze'e da' nyečhje Jerusalénna'. Na' yogo' bene' ca' zja'aque' zjasene'e Daviden' cate' zoa bi da' chesac che', Absalónna' gože' legaque':

—Bitw gwzenag rey chele. Ša neda' naca' ben' chnabia', gwzenaga' che yogo' bene' na' yogüe' chogbi'an che' ca cheyała'.

Leca to bene' šagüe' goc Absalónna' len yogo' bene', na' yogüe' gosenite' güen len le'.

Gwde tap iz Absalónna' gocbe'ede' ba guac žine' latj ga nabi'e. Nach gwnabe' lsens lao rey gac šeje' ciuda da' nzi' Hebrón cont šjene' da' ngo'o cho'e gone' len Diozen', na' goclaže' rey. Perw Absalónna' bitw gože' xen' diža' li, le bečhoglaže' šjasoe' Hebrón na'ate cont gon cuine' rey che Israel. Zan bene' Israel ca' gosede'e le', na' toe' ben' gose'e Ahitofel. Benga goque' to bene' blao len Daviden', leca gwejni'ide', na' Daviden' yolagüe' chnabde'ne' nac cheyała' gone'. Ahitofelen' goque' xta'o Betsabé.

Cate' gwneze Daviden' ba chesyedabague', la' bečhoglaže'te' se'e Jerusalénna' len yogo' bene' güen

žin ɕhe' ca', lente yogo' beɲe' ca' zjanac le' txen.
 Goclaže' yesechoje' lo ciudan' cate za' žin Absalónɲa'
 šjete' legaue'. Can' goc, Daviden' gwɕhe'e beɲe' lo'
 yo'o ɕhe' ca', lente soldadw ɕhe' ca', gosa'aque'
 Jerusalénɲa', perw bia'cze bocua'ane' ši no'ol ca'
 gwzoalenen', no'olen' bi nšagna'lene', gosape' ližen'.
 Chop bɔoz ca' gose'e Sadoc len Abiatar na' len yeto
 chop beɲe' gosajje' lo diaža ɕhe da' Leví jasešague'
 Daviden' cate' ba zoa choje' Jerusalénɲa'. Zjano'e caj
 gan' yo'ošagüe' yej ta'a ca' gan' zjanyoj ley ɕhe Dios
 le gosaclaže' yeso'en šja'aclene' rey Daviden', perw le'
 gože' legaue' šjasyesanen' xlatjen, gwne':

—Še da' li chaclen Diosen' neda', güela'cza'
 Jerusalén ni. Na' le'e guac gaclenle neda' gacle beɲe'
 güia güena', cont ca' gac nezda' bi chac Jerusalénɲa'.

Nach bɔoz ca' len beɲe' zjanac diaža ɕhe da' Leví
 besyeyo'e cajan' xlatjen da' yoble.

Šlac ngo'o Daviden' neza' leca gocyashe'de', le
 gwnezde' ben' gose'e Ahitofel ba chaclene' Absalónɲa'.
 Na' bolgüiže' Dios gwnabde'ne' bi gwzenag Absalónɲa'
 dan' ye' Ahitofelna' le'. Gwdechle yeto beɲe' blao ɕhe
 Daviden', ben' gose'e Husai, gwyeje' jašague'ne'. Benga
 lecze gocyashe'de' dan' chesyedabaguen'. Perw Daviden'
 gože'ne' yeyeje' Jerusalén na'le na' con gone' ca chon
 beɲe' nac txen len Absalónɲa'. Le Daviden' goclaže'
 Husai nga gaue' beɲe' güia güena' ɕhe', da'nan'
 gože'ne':

—Yogo' da' le'edo' na' da' nezdo', yo'on bɔoz ca'
 cont beɲe' qui yesesele' dižan' len neda'.

Beyoža' Daviden' gwlo'e nez, gwyeje' zito'
Jerusalénna'.

94. Diosen' bene' cont bi ben Absalónna' gan

(2 Samuel 16 — 20)

Absalónna' len bene' ca' gosac le' txen besyežine'
Jerusalén na' ben' gože' Ahitofel beyejlene' le'. Nach
ben' gose'e Husai gwyeje' jašague'ne', na' gože'
Absalónna':

—Gaclena' le'.

Na' zoa Husai cate' Absalónna' gwnabde' Ahitofel
güe'ene' consejw bi cheyała' gone', na' benga gože'ne':

—Cheyała' gata'leno' no'ol ca' zjazoalen x̄aon', no'ol
ca' zjanga'an ližen', cont nach yela'ategale toši'ize len
x̄aon'.

Nach bene' ca' gosac txen len Absalónna' gosone'
to yo'o de lache'ze yichj liž rey Daviden'. Beyoža'
Absalónna' gwche'e no'ol ca' zjazoalen x̄en' yichjo'o
na'te cont gota'lene' legaue'. Ca' goc, yogo' bene'
Israel ca' gosenezde' can' benen'. Yogo'ze dan' gwna
Ahitofel bxoe' chen'. Yeto da' la' gwnatie' cheyała'
yob gac, gože' Absalónna' gwtob soldadw che' ca'
cont šjasa'ogüe' Daviden' len bene' ca' gosac le' txen.
Ahitofelen' gwne':

—Cuina' ša'alena' soldadw qui, na' cate' yežaga' rey
ba chjaxe'chğüede', cuina' gota'ne'. Cate' yesele'ede'

ba got Daviden', na' yogo' bene' ca' zjanac txen rey Daviden' yesyede'e le' na' yosozenague' chio'.

Yogo'ze' gosene' leca güen nac xbab chen', perw cate' za' gone' can' gwnen', Absalónna' gwnabde' Husai nac ža toga xbab che', na' benga gože'ne':

—Neda' chacda' šeca na'a gocžejlaže' Ahitofelen'. Xaon' leca ba nezde' che yela' gwdile, na' cabi tase' txen len bene' ca' zja'ac len le'. Na' cate' šjaydiljo'ne', xož yesote' to chop soldadw chio' ca' na' xoa dižan' bnito' yela' gwdil dan' ba gwzolaguon'. Chacda' šeca cheyala' gwtobo' yogo' bene' Israel ca' zjaže' doxen nación, cont šanchgua soldadw chio' ca', na' cate' ba botobo' yogüe', cana'ch šjetwle yogo' bene' ca' zja'aclen rey Daviden'.

Absalónna' len yogo' bene' ca' chesedabague' txen len le' gose'ene' nacch güen xbab che Husai clal ca che Ahitofel, le Diosen' bene' cont Husai gwziye'cze' legaue' len consejw chen'. Da' li xbab che Ahitofelen' gocchen xbab sina'ch clal ca che Husai, perw Diosen' bi be'e latje yesejni'iden' to licha, le bi goclaže' gac güen che Absalónna'. Can' goc, Absalónna' len bene' ca' goson le' txen gosone' can' gwna Husai.

Nach Husai gože' bxoz ca' dan' chaca', na' bene' qui gosesele' rson lao Daviden', gose'ene' la' cheyala'te lague' yegw da' nzi' Jordán cont yele' bi yesezen neca yesot soldadw ca' seła' Absalónna' le'.

Cate' gocbe'e Ahitofelen' Absalón len bene' ca' zjade'e le' bi yosozenague' che consejw dan' bi'ene', na' beyej liže' beyot cuine'.

Cate' beyož btob soldadw che Absalónna', Daviden' ba zoe' zito'ch, to ciuda da' nzi' Mahanaim. Lecze ba beyož btob soldadw che' ca' na' ba nsini'e cont yesediłe'. Xan soldadw ca' bi gosacłaže' šej Daviden' lao gwdiła'. Da'nan' bega'ane' lo ciuda da' nzi' Mahanaim. Daviden' leca gocde' xi'ine' Absalónna', da'nan' bene' mandadw bibi yesonde'ne' lao yela' gwdiłen'.

Nach soldadw che Absalónna' gosedillene' soldadw che Daviden', perw goson bene' che Daviden' gan. Bene' che Daviden' gosote' galj mil soldadw che Absalónna'. Ca' chac, cate'cze besele'e soldadw che Daviden' ba choxonj Absalónna' zežie' to bžina'. Bžina' nga bedeba' to xan yag na' gosa' yichj Absalónna' lo' xoze' yaguen', perw bžinan' bxonjechba', na' Absalónna' goła'dite' lo yaga'ze. Nach to soldadon' jayežsese' Joaben' can' goca', na' Joaben' gwdiłchgüe'ne' dan' bi betue' Absalónna' na'teze. Soldadon' gože'ne' bi betue'ne' da' gwneзде' bi gocłaže' rey no got xi'ine'. Nach Joaben' len yeto bi' zej noa'be' xe' de ya dan' chaze' lao gwdiła', gosote' Absalónna' šlac nała'dite' lo yaga'. Beyož goc ca', Joaben' bzende' bene' ca' ba beyož gwdiła'.

Cate' Daviden' gwneзде' bene' ca' zjanac le' txen gosone' gan gwdiła', perw Absalónna' gote', leca



Cate' Daviden' gw̃ezde' beñe' ca' zjanac le' txen gosone'
gan gwdiła', perw Absalónna' gote', leca gocyaše'de' na'
gwzoe' yeła' güine'.

gocyaše'de' na' gwzoe' yela' güine'. Nach gweyj
Joaben' jatile'ne', gože'ne':

—Neto' chaclento' le', bi chondo' neto' ca cheyała'.
Cheyož chaclento' le', chondo' neto' ca bene'
chgue'edo'. Chona' xbab šeca chaclaže'cho' le'edo'
yogo' neto' gotto' con še mban Absalónna'. Cheyała'
šejo' šježo' bene' ca' zjanac le' txen leca chebedo' dan'
gosaclene' le', le še bi gono' ca', yogüe' yesebejyichje'
le'.

Nach gweyj Daviden' jači'e cho'a puert che ze'e
dan' nychje yež gan' zjaniten', na' bene' chačh laže'
yogo' soldadw che' ca'.

Gague goc sša, to cuen bene' ca' zjanac diaža che
da' Judá ja'aque' jasyediljue' rey Daviden',
gosenabde'ne' yeyeje' Jerusalénna', na' txen
besyego'olene' le' nez jaya'aque'. Perw bene' Israel ca'
yezica' besexi'e bene' zjanac diaža che da' Judá da'
gosone' ca' legacze', nach da' yoble besyedabague' na'
to bene' gože' Seba gwlejlägüe' len bene' ca'
besyedabagan'. Con bene' ca'ze zjanac diaža che da'
Judá bi gosebejyichje' Daviden'. Yogo' bene' ca'
yezica' gosede'e ben' gose'e Seba. Cate' bežin
Daviden' Jerusalénna', gwseła' soldadw che' šjasetue'
Seban', perw benga bcuaše' ga chi' yeto ciuda. Nach
soldadw che Joaben' gosechjde' ciudan' cont
yesedillene' bene' lo ciudan'. Gwzoa to no'ol lo
ciudan', leca gwejni'ide'. Na' gwñabde' Joaben'
bixchen' chaclaže' yonite' ciudan', le ciuda chegaquen'
naquen to ciuda che Israel gan' bene' zjaže' na'

bate'teze ba gosone' güen lao Diosen'. Joaben' boži'e xtižen' gože'ne':

—Toz da' che'nda', gonle lo na' ben' le Seba ben' nac blao len bene' ca' chesyedabaga'.

Nach no'ola' gwlo'oyele' bene' lo ciudan' cont gosote' Seban'. Beyož gosote'nen', bosozale' yichjen' lo ze'e dan' nyechje ciudan' cont goquen lo na' Joaben'. Cate' beyož gosone' ca', Joaben' gwne' ba beyož gwdila', nach soldadw ca' besyeya'aque' jaya'ac liže', na' da' yoble bene' ca' že' doxen Israelen' gosaque' txen len Daviden'.

95. Rey Daviden' bsini'a che' cont gone' to yodao' che Dios

(2 Samuel 24; 1 Crónicas 21:1 — 26:28; 28:1 — 29:22a)

Ba goc sša chnabia' Daviden' Israelen', cate' bene' mandadw bosochele' yiš bal bene' zjaže' doxen ga mbande'. Na' bža'a Diosen' le' dan' bene' ca', na' gwsele' to yižgüe' da' gwche' doxen Israelen'. Lecze gwseļa' Diosen' to angl cont yonite' Jerusalénna', perw cate' bžin anglen' Diosen' bše'e xbab che' na' gože' anglen' bi yoniten'. Anglen' bega'ane' cuit to latje ga to bene' jabuseo chbeje' xa trigw. Cate' Daviden' ble'ede' anglen', Diosen' bene' mandadw gože' Daviden':

—Gono' to mes de yej latj nga ga gonxeno' neda'.

Nach Daviden' gwnabde' bene' jabuseon' gaca' si'e
yežlion' goten'. Benga goclaže' gwnežjwze' yežlion',
perw rey Daviden' gože'ne':

—Chixjuan', le bi chaclaža' gona' lo na' Dios to da'
bibu zaque'da'.

Beyoža' Daviden' bene' to mes de yey na' lagüenna'
betue' to čhop beyixe' benxene' Dios. Nach Diosen'
bene' cont blažo' yi' lo mesen' na' gosey be ca'.
Beyoža' Diosen' gože' anglen' yego'ošagüe' spada čhen'
lo' xen na' noch no gote'. Do cana' yodao' dan' ben
Moisésen' dan' chacte chedobe gwzoan lo ciuda da'
nzi' Gabaón, perw zito'chgua gwzoan še no šej šlac
chi' yižgüen'. Da'nan' ben Daviden' to mes de yey ga
gasonxene' Dios Jerusalénna'. Beyoža' gwna Daviden':

—Latj gan' bena' mes de yey nga naquen latj ga
gon xi'ina' yodao' čhe Dios.

La'czla' Diosen' ba gože' Daviden': "Gague len'
gono' yodao' čhian'", Daviden' goclaže' gaclen xi'inen'
gonen'. Da'nan' gwzolaküe' btobe' yogo' da' ca'
yosočhine' yesonen'. Bzoe' bene' zito' ca' goseže'e
Jerusalénna' gosebejbi'e yey da' yosočhine' yesone' ze'e
čhe yodaon'. Na' btobe' ya ca no da' zjanzi' hierro
na' bronce, na' yag da' nzi' cedro. Lecze btobe' yogo'
bčox ca' len yezica'chle bene' ca' gosac diaža čhe da'
Levín' na' bi'e laze bene' ca' to cuen güeje' gwde
gwdele da' gosone'. Bene' ca' bi gosac bčox, to
cuene' bzoe' legaque' bosoxi bosolo'e' lo' yodaon' na'
yesonšagüe' da' šjasesan bene' yesonxene' Diosen' dan'
zjanac ca no trigw na' no cebada. Yeto cuene' yeso'e

laze žin če yodaon', yeto cuene' yosogüia yesene'e cho'a yodaon', yeto cuene' yosocueže' stroment yesonxene' Dios. Daviden' bžie' bia' yesone' da' qui, le gocbe'ede' bich yesaše' yeso'e yodao' dan' chacte chedobe nile na'le can' ba gosone' cani', na' gocde' cheyała' yesaclenche' bχoz ca'. Do cana' ba nyanch bene' lo diaža če Aarónna', na' bχoz ca' ba gosaque' tapechoa diaža. Da'nan' gosone' ca rifa cont bla' baten' besyeyała' to to diaža čhegaque' gosone' žin lo' yodaon'.

Beyoža' Daviden' gox xi'ine' ben' gože' Salomón, gože'ne':

—Le' gaco' rey dan' zeza', na' cheyała' gono' to yodao' če Dios. Diosen' bi bene' latje gonan' neda' dan' goca' soldadw na' ba betwchgua' bene', perw gože' neda': "Xi'ino' ben' le Salomón gaque' to bene' soa binlo, bitw bi yela' gwdiłe gata' šlac nabi'e, na' le' gone' yodaon'."

Nach Daviden' bene' mandadw gon Salomónna' yodaon' na' bene' mandadw gwzenague' če ley ca' dan' bnežjw Diosen' da' xozxta'ogaque' ca'. Lecze gože'ne' ca nac da' ca' ba btobe' da' yosočhine' cate' yesone' yodaon': oro, plata, bronce, hierro, yag na' yej. Bnežjue'ne' yiš ca' gan' zjanyela' naquen' cheyała' gac yodaon' na' lalatj dan' gata' do cue'ej cuiten na'. Lecze gože'ne' can' cheyała' yesoe' bχoz ca' laze žinna' len yezica'chle bene' gosac diaža če da' Leví. Bzebte gože'ne' Diosen' bi'e lazen naquen' cheyała' gac yodaon' na' naquen' nzi' laz žinna'.

Beyoža', rey Daviden' bene' mandadw yesaclen yogo' bene' gwnabia' che' ca' Salomónna' yesone' yodaon', na' btobe' yogüe' Jerusalén len Solomónna', na' gože'ne':

—Neda' ba bena' xbab gona' to yodao' che Dios na' da' zan da' btoba' da' chyažje cont gaquen, perw Diosen' bi goclaže' gonan' neda', le naca' to soldadw. Diosen' bene' naca' rey che Israel, na' le' ba gwleje' Salomónna' cont gaque' rey dan' zeza', na' nžie' bia' Salomónna' gone' yodao' chen'. Diosen' lecze gwne' cate' gat Salomónna' bia'cze gone' cont bene' lo diaža che' ca' yesac rey, con še yesenite' yesone' can' zjanyoj le'e ley che' ca'.

Na' le' Salomón, cheyała' gonxeno' Dios do yichj do lažo'. Šjayze'eguedo', še gonxeno' Dios na' gwzenago' che', Diosen' soe' len le' na' gwzejni'ide' le' cont nezdo' bi cheyała' gono'. Lecze šjayze'edo' len' gwleje' le' cont gono' yodao' chen', na' ben chach lažo' gono' žinna'. Na' yogo' le'e bene' Israel, le gwsed ley che Diosen' na' le gwzenag chen, cont yega'anle soale Israel nga na' lecze nga yesenita' xi'in diaža chele ca'.

Daviden' gože' bene' gwnabia' che' ca' yesaclene' Salomónna', le ne' naque' bene' xcuide', na' yodaon' cheyała' yega'anen leca xdan. Lecze gože'ne' da' ca' ba bsa' bcode' yeson žin cate' yesone' yodaon', zcha'on naquen che cuincze', nach gwnabde' legaque' še bi da' yosodie'. Zane' gosone' can' gwnen' na' leca bebede'.

Beyoža' Daviden' bolgüiže' Diosen' lao yogo' bene'
gwnabia' che' ca', gwne':

—Xana', le' naco' bene' zaca'chgua. Chono' da'
nono chac gon. Yogo' da' de yežlio nga naquen chio',
na' le' naco' ben' chon yogo' da' chyažjeto'. Neto'
late'ze da' cheyonto' le' ca da' chono' neto'. Le'
nombi'o yichjlažda'oto' na' che'ndo' gonto' to liča len
bi da' chonto'. Le' nezdo' leca chebeda' ba beṇa' da'
qui chyažje gac yodao' chion', na' lecze can' ba goson
bene' qui zjanita' nga na'a. Goclen neto' gonxento' le'
do yichj do laže'to' bate'teze. Goclen Salomónṇa'
gombe' can' zjanyoj le'e ley chio' ca' na' goclembe'
gombe' yodaon'.

Nach Daviden' gože' bene' ca' yeso'e yeḷa' choxcen
che Dios, na' yogüe' bosozoa xibe' goso'e yeḷa'
choxcen che Diosen'. Beyečhj ža gosote' zan beyixe'
gosonxene' Dios. To lṇi xen gosone'.

96. Rey Daviden' bzoje' zan da' gosole' gosonxene' Dios

(2 Samuel 22 — 23; 1 Crónicas 16;

Salmo 18; 96; 105:1-15)

Daviden' bebede' gwdine' arpa na' biḷe', na' lecze
bebede' bzoje' da' gosol bene' na' da' bosolabe' ca no
recitación. Baḷ dan' bzojen' chonxene' no bene' ba
gosat na' baḷen chonxene' Dios.

Qui ža to dan' gosole' dan' bzoj Daviden' cho'e
yela' choxcen che Diosen' dan' bosle'ne' lo na' rey
Saülen':

"Diosen' chapši'e neda' na' chosle' neda'.

¡Yogo' bene' cheyala' yesonxene'ne'!

Neda' nabda'ne' gaclene' neda' cate' de da' zed chia',
na' le' guaclencze' neda' bate'teze.

Cate' gwzoa' lez yesot bene' ca' besegue'e neda',
gwnabda' Diosen' gaclene'nda'.

Bzenague' chia' na' bže'e bene' ca' besegue'e neda',
nach bide' bosle'nda' lo na' bene' ca',
la'czla' gosaque' bene' gualech ca neda'.

Diosen' gocbe'ede' bi cheyala' yesonde' neda' can'
gosonde'ndan',

le bate'teze ba bencza' can' zjanyoj ley che Diosen'.
Da'nan' goclene' neda'.

Can' chon Diosen',
chaclene' bene' chon da' güen,
na' chsaca'zi'e bene' chon da' mal.

Da' li ba goclene'nda'.

Da' chžie' bia' chone' bate'teze nacczen binlo.

Diosen' chapši'e bene' ca' zjanone' le' lez.

Le' goclene' neda' bena' gan bene' ca' besegue'e
neda'.

Da'nan' gua' yela' choxcen che'
na' goła' gonxena'ne' šlale mbana'."

Rey Daviden' bzoje' yeto da' gosole' lo ža cate' caj
gan' yo'ošagüe' yej ta'a ca' gan' zjanyoj ley che Dios
bežinen Jerusalén. Qui žan:

"¡Cheyała' gue'cho yeła' choxc̣len che Dios
na' güe'cho diža' len yogo' bene' che da' ba bene'
len chio'!

¡Golcho gonxencho Dios

na' goncho xbab ca da' zaca' yežejecho ba bene'!
Diosen' bi gonlaže' da' gwlo'o cho'e gone'
len da' Abraham, da' Isaac na' da' Jacob
cate' gože'ne' gone' lo na' bene' lo diaža
cheaque' latj ga mbane Canaán,
le na'a ba benen' lo na' chio'.

Cheyała' güe'cho diža' len yogo' bene' zjaže' yežlio
ye'chone' Diosen' bene' doxen yežlion'.

Cheyała' ye'chone' da' ca' chesonxenen' bi zjanaquen
dogualj Dios, con toze lgu'a' lsaca' zjanaquen.

¡Doxen yežlion' len bene' ca' zjaže' yežlion'
cheyała' yesonxene' Dios, le len' bene' yežlion'!

¡Bate'teze yogüe' cheyała' yesonxene' Jehová!

¡Le' naque' Dios ben' chonxen chio' bene' Israel!"

Cate' ba zoa gat rey Daviden', Cate' bzoje' yeto da'
gosole'. Qui žan:

"Neda' naca' David, Diosen' bene' neda' rey che
Israel.

Neda' choła' chonxena' Dios,

na' Spíritw che Diosen' chzejni'in neda'
bi cheyała' ĩia'.

Diosen' že':

Cate' to bene' gwnabia' chape' bala'an ley che Dios
na' da'nan' chone' güen len bene' yo'o lo ne'e,
chone' ga yogo' bene' chesezoe' mbalaz.

Bene' lo' yo'o chia' ca' zjazoachache'

chesejnilaže' Dios.

Na' Diosen' ba bžia bi'e to da' güen

da' gone' len neda' da' bi te che.

Perw bene' ca' bi chosozenague' che Diosen',

bibi zjazaque'.

Zjazaca'lebe' ca xoze yag da' zjažiachgua yeše'.

Ne to benach ca cheyaxje goxen' len taque',

toz da' gac gonchon' guague."

97. Salomón xi'in Daviden' goque' rey gwyon che Israelen'

(1 Reyes 1:1 — 2:12; 2 Crónicas 29:22b — 30)

Cate' goxo' rey Daviden', con beyague', ne to bibi
gota' da' yoše'e le'. Nach bene' güen žin che' ca'
gose'e le' chiljue' to no'ol xcuide' bene' nac xdan cont
güia ne'e le' na' taslene' le' txen, cont ca' yeže'ede'.
Nach goseyiljue'ne' na' beseželde' to no'ol dao' gose'e
Abisag.

Bi' che Daviden' bi' ne' mban, bi' zej cože'
Absalónna', gože'be' Adonías, na' gocczebe' xdan, perw
xaben' ne tni'a bi gože'be' bi da' cheyała' gombe'.
Gocbe'ebe' ba goxo' xaben' na' bich nale', da'nan'
bečhoglaže'be' gacbe' rey dan' za' zeza'. Nach btobbe'
to xonj bene' goson lebe' txen. Beyoža' bolgüižbe'
Joab ben' goc xan soldadw che rey, na' yeto bxož
ben' gose'e Abiatar, na' gwlo'oyela'be' legaque' cont
gosaque'be' txen. Perw bxož ben' gose'e Sadoc, len
ben' be' xtiža' Dios ben' gose'e Natán, len yeto xan
soldadw ben' gože' Benaía, na' len bene' ca' gosap rey

Daviden', legaue' bi gosone' Adoníasen' txen. Nach Adoníasen' bembe' to l̥ni latj ga nzi' Rogel na' goxbe' yogo' bene' ca' chesenabia' lao bene' ca' zjanac diaža che da' Judá. Lecze goxbe' yogo' bi' biše'be' ca', con toze Salomón̥na' bi goxbe', n̥ca goxbe' Natán, n̥ca soldadw ca' zjade'e rey Daviden'.

Na' cate' Natán̥na' gw̥nezde' bixen' chon Adonías, gwyeye' jan̥e'e Betsabé ben' goc x̥na' Salomón, cont ježe'ne' can' chaca'. Gože'ne' šjayse'ede' laže' Daviden' ba gwne' gone' Salomón̥na' rey bene' za' nabia'. Nach Betsabén' gwyeye' jašaljlene' rey, na' gože'ne' yogo' can' ba gož Natán̥na' le'. Ne' chosošaljtie' ca' cate' bžin Natán̥na', nach cuincze' gože'ne' naquen da' li can' ža no'olen'. Daviden' goxe' Benaía ben' goc x̥an soldadw ca' gosap rey, na' gože'ne':

—Bžia Salomón̥na' bžina' čhian', gw̥che'be' Gihón. Nga Sadoc len Natán yosozoe' set yičhjben' cont yeseneze bene' lebe' nache' rey bene' za' nabia'.

Sadoc, Natán na' Benaía gosone' can' gož Daviden' legaue', na' bene' ca' jasa'ac jasene'e can' gosonen', bososye'e, gosene':

—¡Viva rey Salomón!

Adonías len bene' ca' gosac le' txen za' besyedagwtie' xgüe cate' gosende' žaš dan' cheson bene' ca' zjanaue' Salomón̥na' txen. Gosone' xbab bixen' chac, cate' la' bžinte xi'iq̥ Abiatar na' bi'e diža' can' ben Daviden', gwne' Salomón̥na' gac rey bene' za' nabia'. Beyož gosende' da' nga, yogo' bene' ca' gosenita' l̥ni len Adoníasen' besežebe' na' bosyoxonje'

jaya'ac liže'. Perw Adoníasen' gwyeye' lo' yodao' dan' chacte chedobe na' jexoe' da' tošen' gosenita' squin che mes gan' bosozeye' beyixe' gosonxene' Diosen' cont Salomónna' bi gote' le', le can' goc costumbr da' goson bene' Israel ca' cate' gosacłaže' bi yesot bene' legaque'. Nach Salomónna' gože' Adoníasen':

—Bi gota' le' še bich cueco' da' zed na' con yeyej ližo'.

Gocbe'e Daviden' ba zoa gate'. Da'nan' zelao bzoe' consejw che Salomónna' ben' nac rey cobe, gože'ne':

—Neda' nezda' ba zoa gata'. Cheyała' yechoglažo' bi dan' gono', na' gaco' bene' chačhlaže'. Gac chio' güen še bate'teze gono' can' zjanyoj ley che Diosen'. Še gwzenago' čhen', Diosen' gone' da' ngo'o cho'e gone' len neda', le gwne' bate'teze gac rey che Israelen' to bene' lo diaža chia'.

Lecze gože'ne' gwdelaže' nac gone' che Joaben' dan' betue' xan soldadw ca' ben' gose'e Abner na' Amasa.

Cate' got Daviden', ba goc čhoa iz naque' rey che Israel. Xi'ine' Salomón bolane' xlatje' la' goctie' rey, na' bžie' goque' to bene' gwnabia' blao, le Diosen' bene' goc che' güen.

98. Salomón gwnabi'e lao nación Israel

(1 Reyes 2:13 — 4:34; 2 Crónicas 1)

Gwde to tiemp cate' beyož got rey David, xi'ine' Adonías gwyeye' jane'e Betsabé no'olen' goc xna' rey

Salomón na' gwnabde' le' gone' goclen nabde'
 Salomónna' gwnežjue' latje gwšagna'lene' Abisag bi'
 no'ol xcuiden' gwna'be' rey Daviden' caten' ba zoa
 gate'. Nach Betsabén' gwyeye' na' janabe' da' nga lao
 Salomónna', perw cate' le' bende' dan' chnabe xnen'
 le', blocchgüe' na' bene' mandadw len to soldadw
 chen' šjetue' Adonías, le' gocbe'ede' Adoníasen' goclaže'
 gwšagna'lene' Abisag cont gac latje žine' gaque' rey.

Nach Salomónna' bolague' bħoz Abiatar
 Jerusalénna' na' besele' le' jayzoe' ciuda ga goc laže',
 le lene' goque' toz Adoníasen'. Bi bene' mandadw
 yesote' le', le ba goclene' da' xe' rey David. Abiatar
 nga goque' diaža che da' Elí na' dan' goc da' qui goc
 can' gwna Diosen' cani' che bene' lo' yo'o che Elí.

Na' Joab ben' goc xan soldadw gop ca' che da'
 rey Davin', cate' gwnezde' can' ba ben Salomónna' len
 Abiatar, bžebchgüe', nach gwyeye' na' jexoe' da' toše'
 gosenita' squin che mes gan' gosote' beyixe'
 gosonxene' Dios cont gota'yoede' Salomónna' bi
 yesote'ne', le lencze len' goque' Adoníasen' toze caten'
 besyedabague'. Perw Salomónna' bia'cze gwsele'
 Benaía ben' goc xan soldadw chen' jetoe' Joab latje
 gan' zie' na'teze dan' betue' chope soldadw blao ben'
 gose'e Abner na' Amasa ben' gosaque' txen len da' xe'
 rey Daviden'. Bene' mandadw jetoe' Joaben', le da' xe'
 Daviden' gože'ne' cheyała' gote' le'. Cana' gwzelao
 gota' da' zed gota' che Salomónna' len bene' goclaže'
 yolane' xlatjen', na' yogo' bene' Israel ca' gosazlaže'
 dan' chnabi'en'.

Cate' gwde to tiemp, rey Salomónna' btobe' yogo'lol bene' Israel ca' na' gwyeje' len legaque' gan' nzi' Gabaón latj gan' gwzoa yodao' chegaque' da' chacte chedobe. Na' betw Salomónna' to mil beyixe' be bnežjue' Dios benxene' le'. Že'na' Diosen' gwnabde' le' gože'ne':

—¿Bi che'ndo' gona' le'?

Na' Salomónna' boži'en gwne':

—Le' ba beno'nda' rey che bene' zan qui že' nga la'czla' ne' naca' bene' xcuide' na' bi nejni'itecda'. Goclen neda' gaca' bene' sina' cont nezda' bin' nac da' güen na' bin' nac da' mal, cont gaca' to rey güen len bene' yež chio' nga.

Diosen' gwyazlaže' dan' gwnabde' le' gwnežjue'ne' yela' sina', na' gože' le':

—Bi gwnabo' gaclena' goto' bene' chgue'e le' o gona' bano' sša o gona' gaco' bene' gwni'a o bene' gwzechgua che. Perw le', gualaz da' ca', gwnabo' gaclena' le' gaco' bene' sina'. Da'nan' gona' le' dan' gwnabdo' neda', perw lecze goncza' le' bichle da' yoble. Gona' le' rey bene' la'zelagüe bene' gwni'a na' bene' la'zelagüe gwze che' doxen yežlion'.

Na' gwde to tiemp cate' chop no'ole ja'aque' jase'e rey Salomónna' gosenabde' le' gone' yela' justis che dan' chac chegaquen'. Legaque' gosezoe' toz yo'o, na' chope' gosezane' yelate'ze ca btił toz ža. Perw goc to že' got to bidaon' na' beyožen' chope' gosacdiłde' bidaon' ne' mban še noe' nac xna'be'.

Cate' reyen' bende' da' nga, gwnabde' xmose' ca'
šjasexi'e to spada' na' beyoža' gože' legaue'
yesečogue'be' yesone'be' čhop lašjw na' gwnežjue'
šalčhog güejbe' to toe'. Nach ben' goc xna' bidaon'
gwne':

—Le gon goclen bitw gonle ca'! Yeyoa'ch no'ola'
yeto lebe'.

Gwne' ca' da' gocde' bidaon' čhen' nan' bene' xbab
yejñi'a yega'anbe' len no'ola' clel ca' yesote'be'. Perw
no'ola' yeto gwne' yesečhogche'ben'. Gwne' ca' le še
le bi yega'anlene' bidaon' lecz bi goclaže' yega'anlen
no'ola' yeto lebe'. Nach Salomónna' gwne':

—Le gwnežjw bidaon' no'ola' beyaše'de'be', le len'
nac xna'be'.

Na' ca' gosone'. Na' cate' bene' Israel ca' gosende'
can' gwčhogbi'en čhe bene' ca', yogüe' gosacbe'ede' le
Diosen' bi'e le yela' sina'.

Šlac gwnabia' Salomónna' bene' Israel ca' gosenite'
binlo, bibi da' zed gota' čhegaue'. Salomónna'
gwnabi'e zan nación ca' zjanita' cue'ej cuit nación
Israelen' na' bčhixjue' legaue' mechw to to iz, na' ne
to notno bi bene nación Israelen'. Nach bžine'
gocchgüe' to bene' gwni'a. Gwnita'chgua xcabayoe' na'
carret na' gota'chgua da' gosagüe'. Šlac Salomónna'
goque' rey gocchgua güen čhe yogo' bene' Israel ca'.
Lecze Salomónna' gocchgüe' to bene' sina'. Bzoje' da'
zan diža' xdan na' da' golcho, na' bsede' nac zjanac
yixe' cuan na' beyixe'. Na' da' gocchgüe' bene' bze

che, zito'te gosa'ac bene' cont bosozenague' ca bi'e diža', na' yogüe' goso'e bi da' bosonežjue' le'.

99. Rey Salomón bene' to yodao' blao che Dios

(1 Reyes 5 — 7; 2 Crónicas 2:1 — 5:1)

Hiram rey che ciuda Tiro, do tiemp goque' xmigw rey David. Da'nan' cate' got Daviden' gwsele' bene' jaseže' Salomónna' mbalaz soe' dan' ba naque' rey. Nach Salomónna' gwsele' rson len Hiram gwnabde' le' sele' bene' güen žin chen' cont txen len bene' Israel ca' yesechogue' yag cedro da' zjaze do yežlio che bene' Tiro ca', yag da' yosoehine' yesone' yodao' che Diosen'. Hiram boži'en gože'ne' guaccze. Nach Salomónna' gwsele' bene' jasaclene' bene' güen žin ca' ba gwsele' rey Hiram cont gosone' žinna' nac ca', na' lecze gwsele' da' gose'ej gosagw bene' güen žin ca'. Can' goc, Salomónna' benšagüe'che' yag da' bosochine' gosone' yodaon', bi cuent dan' ba benšagüe' da' rey David.

Nca'a tap iz chnabia' Salomónna' cate' gwzomagüe' chone' yodaon', na' ca tiempa' ba goc tap gayoa taplalj iz besyežaš bene' Israel ca' Egipton'. Salomónna' bene' yodaon' latje gan' ben da' rey Daviden' mes gan' bzeye' beyixe' benxene' Dios ca tiemp cate' gwche'chgua yižgüe'. Yo'ona' goquen do ši metr zлага' na' šichoa metr tonle na' šino' metr sibe.



Salomónna' gwsele' beñe' jasaclene' beñe' güen žin ca'
gwseļa' rey Hiram cont txen beseçhogue' yag cedro da'
bosochine' gosone' yodaon'.

Na' con ca cho'ocho gwze to lšil da' goc leben zлага' che yo'ona' na' goquen do gayo' metr lo'ole. Na' bosozie' to lache' lo' yodaon' cont bchojen chople. Dan' gwzoo con ca cho'ocho goquen galj metr tonle na' ši metr zлага', na' dan' yeto bososi'en Latje Gan' Zoa Dios, na' goquen ši metr zлага' na' ši metr tonle. Dan' bososi'e Latje Gan' Zoa Dios, na' gwxxa caj gan' yo'ošagüe' yej ta'a ca' gan' zjanyoj ley che Dios, na' cože' cajan' bosonite' chope lgua'a lsaca' che angl. Na' cue'ej cuit yodaon' gosone' zan cuart dao' gan' bosozie' bica' da' bosochine' lo' yodaon'. Yo'on goquen de yej na' lo'ole goquen de yag cedro na' bosoguzjen oro. Na' gwze to mes ga bosozeye' yal na' ši mes ga gosecua' yetextil dan' gosone' lo' na' Dios, na' ši candeler na' yeto gayoa ša' che yodao'. Yogo' da' qui gosaquen de oro.

Yeto bene' gože' Hiram bzoe' xlatje' ya dan' že' bronce cont gosone' to pil xen ga gwžia nis na' ši ša' xen de ya ga goseyib taque', na' bosoziatien rued cont goc gosexoben' nile nale. Lecze gosone' to mes ga gosote' beyixe' na' bosozeye'ba' gosonxene' Dios, na' gosone' bica'ch xšinłaze' da' bosochine' cate' gosote' beyixe' gosonxene' Diosen'. Na' gosone' chope bdop yiže da' gosenita' cho'a yodaon'.

Gaž iz besyełalde' gosone' yodaon' na' beyož gosonen' cate' goc šnej iz chnabia' Salomónna'. Na' cate' beyož žinna' Salomónna' bže'ešagüe' oro na' plata dan' bsa' bcode' da' xe' rey Daviden' che Diosen', bože'šagüen' lo' cuart dao' riz ca' dan' gosone' cue'ej cuit yodaon'. Nach Salomónna' bene' mandadw gosone'

liže' ga cui'e nabi'e Jerusalén dan' gocch ciuda blao
che Israel.

